

ASO FARAILE, 22 IUNI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoaofaitulafono.

E momoli atu foi le faamalo ma le faafetai i leni taeao fou ua maleifua mai i le lagi e mama ma le soifua manuia, i le afio o lau Afioga i le Taitai o le Malo lau Afioga i le Palemia, faapea foi i Afioga i le Kapeneta, faapea foi le paia o le mamalu o le Palemnene, o lupe lava na faia mai i le fuifui e le atunuu e ala i le valaauina.

E faapea foi ona faatalofa atu i Faauluuluga o Matagaluega, o Faalapotopotoga a le Malo, aemaise o le auaunaga a le Malo o lo o faapena ona tatou tofua i le faatinoga o le valaauina. Ia faamanuia foi le Atua i le tapuai mai a Samoa.

FAASILASILAGA MAI LE TAITAI O LE MAOTA

Na fofogaina e le Fofoga Fetalai Faasilasilaga mai le Taitai o le Maota.

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofaitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Puipuiga mai Tupe e Faaofi mai Faasolitulafono 2018.

TUUINA ATU i leni aso 19 o Iuni i le tausaga 2018.

(Sainia): **Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi**
TAITAI O LE MAOTA.

22 IUNI 2018

Faasilasilaga Mai le Taitai o le Maota

E tusa ai ma le Tulafono Tumau 100(2), ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua taua i lalo i lona Tulaga Faanatinati.

1. Tulafono Tau Faaofi o Teuteuga o le Tulafono o Fua Faatatau o Lafoga o Oloa Gaosia i le Atunuu 2018.
2. Tulafono Tau Faaofi o Teuteuga o le Tulafono o Lafoga o Tupe Maua 2018.

TUUINA ATU i lenei aso 21 o Iuni 2018.

(Sainia): **Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi**
TAITAI O LE MAOTA.

TUUINA ATU O PEPA

Na tolaulau e le Failautusi le P.P. 2018/2019 Nu.40, Lipoti o le Usugafono i le Fonotaga a Sui Usufono Fou o Palemene o le Taupulega – Usuia i Lonetona, Peretania Tele, 26 Fepuari – 1 Mati 2018, e tusa ai ma le T.T.49.

TULAFONO TAU FAAOFI O TEUTEUGA O LE TULAFONO O PUIPUIGA MAI TUPE FAAOFI MAI FAASOLITULAFONO 2018 – faitauga faalua

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, talu ai ona ua toesea le Minisita o Tupe i nisi foi o tiute faale-Malo i atunuu i fafo, ia o lea ua ou Minisita ai o Tupe i lenei taeao. Ou te tulai atu ai ma lou agaga faaaloalo, e momoli atu le faamalo i lau Afioga faapea foi le mamalu o le Maota i le maleifua ma le alafai mai i le soifua manuia i lenei taeao fou ma le lagi e mama ma le soifua lelei, tatou te auai foi i le talosaga na e siitia e faafetaia ai le alofa o lo o tatou Matai i le taitai saogalemu mai o lo outou soifua ma so matou ola, aua galuega tuua o feagai ma le Maota i lenei taeao fou.

Lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Puipuiga mai Tupe Faaofi mai Faasolitulafono 2018 i lona faitauga faalua ma ou te fia tautala faamalamalama i ai.*

Faaluaaina e le Minisita mo Pisinisi ma Alamanuia, ma le Minisita mo le Soifua Maloloina.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

FOFOGA FETALAI: Ia ma o le avanoa lenei e tapa ma le faaaloalo lau Afioga i le Taitai o le Malo.

Susuga Hon TUILAEPA AUULUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le Tulafono lenei o lea ua uma ona valaauina uma foi le Maota e faia le faamalamalama, e faia e i latou o Ofisa Sili o Matagaluega aemaise foi o le Kovana o le Faletupe Tutotonu, o ia lea o lo o faafeagai ma lenei foi atinae tele a lo tatou Malo lea sa afio mai faamatalatala atu foi i le paia o le Maota nei e faamalamalama ai ia le Tulafono lenei ma isi foi Tulafono o le a tagofia e le Maota i le taeao nei.

Ou te manatua o le isi lea faiga fou feagai ma le Maota sa amata i le Paeaiga talu ai e le foi sa faauluulu i ai le tatou Matagaluega o le Fono Aoao Faitulafono. O se faiga fou e suia ai le tulaga sa masani ona sau ai le Maota lenei. Ou te manatua le taimi na faatoa ou ulufale mai ai i le 37 tausaga talu ai i le Maota lenei, e leai se avanoa e te faitau ai se Tulafono, na ona faataoto lava i le taeao faatoa aumai ma Tulafono. O le mea la sa matou faia, ona o le potu masani sa i ai i lo matou taitai ua leva. E amata loa le Fonotaga tu loa i luga Tofilau lauga, lauga pea pe 15 miniute o lauga i le Tulafono, ae faavae i le potu maani. E uma ane lana lauga ona faasolosolo mai lea ia matou ua lava le taimi e faitau tope tope ai Tulafono uma ia. O mea na na sau ai le Palemene lenei. E io toai ai lava la le isi ma le lē malamalama. O lea la na suia i le Paeaiga talu ai, ua faataoto ai e lau Afioga i le Fofoga Fetalai ma la outou Matagaluega ia le aso faapitoa e valaau uma ai ia sui usufono o le Maota lenei, ona talaaoo mai ai lea ae faamatala, faamatala e i ai ia Faauluuluga o Matagaluega e fitoitonu i ai Tulafono. O a la lavelave e tulai mai, o i la e tuu tonu ai lava e pau tonu ai lava le samala i le ulu o le fao, e faamatala mai ai lea lavelave o le faapogai o lea Tulafono ma le faapogai o lea Tulafono, o le mafuaaga e suia ai se fuaiupu.

O lona uiga la, ua suia atoa lava le galuega a le tatou Palemene, ua faigofie ona malamalama-gofie ia a outou Afioga i sui usufono i se Tulafono. O lona uiga la, a uma atu la lau mataupu lea o le a ou toe faamalamalamaina atu ai, ae toe tulai mai se sui usufono e toe fesili mai, o lona uiga o le sui usufono lena e le i auai i le faamalamalama. E i ai lava lou talitonuga, e leai lava se isi o outou e toe fesili mai, aua foi o lena ua outou malamalama uma i ai, ae pau lava le mea ua ou tutulai atu ma faataunuu pea ia aga faamasani a le Palemene, leaga o lea e faafogafoga mai lo tatou atunuu. A o lea e fola i luma o lea ou te tilotilo atu, e tau le iloa atu o outou fofoga i le tele o na mau pepa o lo o tumu mai i o outou luma i le tele o le galuega o lo o feagai ma a outou Afioga i le faitauina o nei mau pepa. A o le mea ou te ofo ai, e tou te malamalama ai lava i nei pepa e faataatia i outou luma, sa le masani ai i le matou nofoaiga i aso ua tuanai. O le isi sui usufono e oo lava i le taeao le fono o la e ona i le 24 itula sa tafao i le RSA. A o lau tilotilo atu, e leai lava ma se isi e faasuaava, aemaise o lea e taeao po o le Aso Faraile.

22 IUNI 2018

Tulafono Tau Faaofi o Teuteuga o le Tulafono o Puipuiga Mai Tupe Faaofi Mai Faasolitulafono 2018 – faitauga faalua

Lau Afioga i le Fofoga Fetalai, o le Tulafono la leni o le Money Laundering Prevention, o lo o faaigoaina o le Tulafono Tau Faaofi o Teuteuga o le Tulafono o Puipuiga mai Tupe Faaofi mai Faasolitulafono 2018. E mafua ona taua le Tulafono leni, ona e i ai le tatou pisinisi lea e fai na pasia i le tausaga e 1987 ia le Tulafono e faatu ai le pisinisi lea, ae faatoa amata o lea ou te tau manatu nei o le 1992 a o ou Minisita o Tupe, na faasolo ai lea o le ituaiga pisinisi leni, tatou te faatosina mai ai ia kamupani mai fafo e omai e lesitala a latou kamupani iinei. A o le uiga o lena mea o le omai e lesitala iinei, e le totogi ai ni a latou lafoga i o latou atunuu. O lea la sa masani ona faalupe, o le *Tax Haven* ia ma o ituaiga pisinisi foi la nei, o le matua inosia e atunuu malolosi foi lea, ona e fai mai a latou, ua ninimo mai i ai le tele o latou pisinisi. Ae pau lava le mea lea e tatou, o le sue o a tatou tupe e lesitala iinei ma totogi a latou laisene, ae faatino a latou pisinisi i le mea la e i ai. E pei o ituaiga pisinisi eseese e faaoga i ai le mafaufau o tagata faaneionapo. E faaigoa la le tatou vaega lea o le Offshore Banking i le faaperetania.

O le faafitauli la o mea faapenei, o lea e fai mai ai atunuu ua leva ona manao e tape ia pisinisi nei a tatou pisinisi ia aua ai ne i toe maua ni a tatou seleni, ona faaoga lea e latou manatu e sao mai ai tupe eleelea. O lona uiga o lea mea, o tagata foi ia e tele a latou tupe e omai e laisene iinei a latou pisinisi a tagata e maua mai i le mea lea o le fasioti tagata, o le gaioi, o le gaioi i tupe a latou malo, ia ona faaaua mai ai lea e faalafi i totonu i i. A o lea ou te tau manatua, o Switzerland sa na amatamea i ituaiga pisinisi faapenei, ia o le tele lava o le mau dictators o tagata ia sa pulea malo in a onapo, e pulea e faaoga ai meatau foi ia e pule malosia ai tagata, e masani ona gaioi i mea ia ma ave faalafi i totonu o ituaiga pisinisi faapenei. O lea la ua faataoto ai Tulafono, o tulafono la ia ina ia mafaia e ituaiga atunuu faapenei po o pisinisi faapenei ona lipoti sauni lipoti, aua ne i toe sao mai ai ia tagata amioleaga e aumai a latou tupe, o fua o a latou amioleaga, o le fasioti tagata ae totogi. Le mea foi lea e faapea mai, ia aumai le fia miliona, ia ona faasao atu lea o lou atalii lea ua matou gaioia. O ituaiga mea la na Money Laundering lea e faalupe o money laundering, o tupe eleelea lea e faatonu uma ai lava ia atunuu e fai a latou pisinisi nei, ia fai ma lipoti atu ia aua ia aua ne i toe tupu se mea faapea.

E lavea ai foi la ma latou o lea e i ai le fuaiupu lea tolu, e faatulafonoina uma ai ia kamupani i atunuu i fafo mea o kamupani faamavaega, ia matua maati le latou suesueina o ni kamupani faapenei e oso atu i o e lesitala ai latou kamupani ona aumai ai lea i lalo o le kamupani lea Trust Company lea aumai faatu i Samoa nei. O lea la ua faatulafonoina i lalo o le Tulafono leni i le (3), ia aua ne i toe sao ni mea faapea, ua tuuina atu ai le tiute le obligation, e noatia ai latou e ana ituaiga pisinisi ia, aua ne i, a sao mai se tulaga faapea, e tietie i o latou luga ia le sala. E i ai le mea na tupu i le tausaga e 2003, e i ai le faipisinisi mai Amerika Samoa na sau e manao e lesitala le latou kamupani iinei. Ia e atoa le lua aso ae tifa mai ia te au, ua matua tumu i le ita.

22 IUNI 2018

Tulafono Tau Faaofi o Teuteuga o le Tulafono o Puipuiga Mai Tupe Faaofi Mai Faasolitulafono 2018 – faitauga faalua

Ona fai mai lea o le faipisinisi lea mai Amerika Samoa, ou te le iloa la alii po o le a o lea ua sau le Samoa e aumai ana tupe e teu i i, a o lea foi ua masalomia. O le mea lava lea a tatou o le lotoleaga. O au lea o le a alu. Fai atu o fea e te alu i ai? Ou te nofo i o i Kalifonia. Ona ou fai atu lea, o, alu, aua e te popole, ae taatia mai lau mataupu, e te oo atu i o ua maua ma le tali i lau mataupu, fiafia lava lea o si toeaina, alu. Ona ou aamia loa le faauluuluga o le tatou pisinisi po o le tatou teugatupe lea o pisinisi mai fafo, ona ou fesili lea i ai, o le a tonu le tulaga o le toeaina lea mai Amerika Samoa? Ae fai mai ia le Faauluuluga, sa ou tuua i ai pepa e faatumuina ae musu e faatumu, aemaise lava le mea lea e tusiina ai i i, i le \$2miliona lau tupe lea ua aumai, i le taimi lena e tatau ona \$3miliona, e alu la e faaatoa mai ma tau mai, po o fea e aumai ai au tupe. O fesili lava na e tatau ona ave i kamupani uma. O le mea lena na tifa mai e faalii ona e musu e faatumu.

Sa ou fai lava i ai, e leai lava se isi e i luga o le Tulafono, ae aua e te popole alu e maua atu le tali. Tau mai loa, ou fai atu i le Pule, o le a lau fautuaga? I lalo o le Tulafono e teena, alu e tapena mai se ta tali, e sainsi ai au e logo ai ia si toeaina, e le mafai ona resitalaina lana kamupani, leaga o lea na te le faatumuina mea ia. E taunuu atu la i Kalifonia, ua taatia mai lau tali e le mafai ona fai lau mataupu. Tusa e 6 tausaga mulimuli ane ai, ae sau loa le faaaliga a le FBI leoleo a Amerika e se i vaai ane lava le fala lea, o lena e i ai lana pisinisi i ina. Ou tilotilo atu, o le alii lava lea na teena atu i inei, a ua alu la resitala lana pisinisi i le kamupani Trustee i Singapore. Ua ese ai la le igoa, na fai lava le suesuega a le Trustee Company lea faamavaega i le pisinisi a le alii lea, e suesue atu lava e leai se mea e faaletonu, o le ala la lena na aumai ai loa, nofo loa latou ma aumai, e resitala i la tatou atinae lea i le Offshore Centre.

Ia lea la e le i umi na resitala, ae solitulafono loa, sue loa e le FBI, sue lava maua mai i inei i Samoa lea e oso mai i Singapore, o le mea la lena na sao ai, ua sui le igoa o le kamupani. O le mea la na fai a silasila ane, i le isi vaega lea, vaega 10, lea e aumai ai le aiaiga e mafai ona taofia ai, ia ni tupe foi ia lea freeze, i totonu o se faletupe i Samoa nei a i latou ia, pe afai ua mautinoa ua soli ia le Tulafono. Lea la ua tuu i le pulega, ao le taimi lena, na ou faaogaina ai lou malosia faaminisita, na taofi ai na freeze atoa ia le latou \$11miliona na i totonu o le faletupe. Na matua taofia ai mea ia, pe manatua na faasalalau o le a su nei Tuilaepa ma lana faigamalo, e le Kamupani lenei, ia ae ua ou fiu e tatali. Ae na maua ia, na fai le faamasinoga i Amerika, ma falepuipui ai le uso mo ni tausaga se tele.

Lau Afioga i le Fofoga Fetalai, o lea foi e aumai i le Tulafono lea, le vaega 12 o le Tulafono, o lea o lo o aumai ai le tulaga o mea foi nei o mea nei o vaegatupe e i lalo o le 12 e sau ai mo mea o teuteuga 2,4,5. O teuteuga uma lava o isi Tulafono e aafia i le teuteuga lea. O lona uiga, e ala la ona fai teuteuga ia, ina ia faamalosia ai ia le teuteuga o tagata nei e ono molia i le faaoga mo mea o tupe nei o tagata solitulafono.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

E matua liolio i ai i atunuu uma e pei o tatou, ma faalapotopotoga a lalolagi, lea foi la e mafua ai ona tatou faaeteete, te i ua tuu tatou i le lisi uliuli foi lea o atunuu o lea e faataga mea ia. O lea la e aumai ai le Tulafono lenei, e faamalosi ai o Samoa, e matua ilitata ma e malolosi ia ana Tulafono, ina ia pue ai i latou ia ina ia aua ne i tatou faia solitulafono e pei ona aiaia.

I le Tulafono i lalo o le vaega lona 6, o i ina foi o lo o taoto mai ai, le faamalosi o aiaiga o le vaaiiga o latou e feoai, ae faatino e le boarder. O lona uiga, o le taimi e taunuu mai ai, ma tuuvaa ese atu ai i le malaevaalele po o le uafu, ona o i, e ono sao mai ai ni tupe faapenei aemaise totonu o atopau, e nisi foi e o ese ma tatou, ae nana atu ni tupe i totonu o atopau ma ave faanana i fafo. O lea la e lavea uma i le mea lea, le paoa lena e mafai ai ona molia ai le tagata ua latou faaoga auala nei e faatino ai le solitulafono lea e faasa i lalo o le Tulafono lenei.

O le agaga atoa o lenei Tulafono, ina ia tau atu i Malo uma, o lo o galulue faasagatau i tagata solitulafono, e le mafai ona faaogaina Samoa. O se atunuu e sao ai ni faiga piopio faapenei, lau Afioga i le Fofoga Fetalai, ia o le Tulafono atoa lena.

FOFOGA FETALAI: Malo faafetai,

Afioga Sulamanaia Fetaiai Tauiiili Tuivasa (Vaimauga Sasae): Lau Afioga i le Fofoga Fetalai, pe maua se avanoa?

FOFOGA FETALAI: Ia tulai mai le sui usufono mo Gagaifomauga Nu.3.

Susuga Hon Laauli Leuatea Polataivao Fossie Schmidt (Gagaifomauga Nu.3): Ou te tulai ma le ava tele ma le faaaloalo i lenei taeao fou. Tatou te sula ai le alofa ma le agalelei o le Atua ua alafai mai le Palemene i ona fanuga lelei.

E faatalofa atu foi i lau Afioga i le Fofoga Fetalai, ia aemaise le paia o le tatou Palemene. Masalo o lea ua taatia i lagatonu le saunoaga a le Afioga i le Palemia, faamalamalama ai lenei Tulafono taua. E po foi Malae i le tulaga taua ia aemaise foi ia suiga tetele o le manatu ma le lagona e tele ma tele le afaina o tatou tagata aemaise foi o fefaatauiga i lenei vaitaimi.

Maitau foi i lenei vaitaimi o lea ua taatia le amoa aua nisi foi o Tulafono tau lafoga, o lo o agai mai i le tatou Maota fonu. O lea foi ua malamalama ma manino tulaga o folasaga o Matagaluega taitasi sa folasia ai le faamaninoga o nei Tulafono uma aemaise lo latou faatinoina. E pau lava lea o le tautaulenuu lau Afioga i le Fofoga Fetalai, o le a fa au a le tatou Malo, ona o le tuualalo, o se Tulafono e soalaupule lelei ma atoatoa ma manino, ia manino toa le tai, manino le mata o le vai,

O le tautaulenuu la lau Afioga, ona o le tulaga lea o le faanatinati, e a pe a finagalo malie, a toa lava ma malamalama tatou o le Palemene, ua lelei.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

A o le avanoa mo le atunuu, e o mai se i silasila ma faafogafoga i le Tulafono, ona o le popolega lau Afioga, e i ai nisi o tatou Tulafono na faaalu i le tulaga lea o le faanatinati, ae uma foi tele ai foi le fesiligia ma le le mautonu ma le pisa o le atunuu ona o le leai o se avanoa. O le ala lea la Afioga i le Fofoga Fetalai, o le tatalo ma le agaga faaaloalo e aumai se avanoa, i totonu o Komiti Faapalemene, i le tulaga masani, ona momoli foi lea i le atunuu e o mai e soalaupule le Tulafono, a maea, momoli mai i le Maota, ona fai lea o le faaiuga.

O le tatalo lau Afioga, o lea e maitau, tele ia tatou Tulafono, fau fau fau toe sui, fau fau tuu ae toe sui, ona o tulaga nei lau Afioga. Na ona ou tuualalo, ma ou faaooloo malofie, ni a fa au ina ave le avanoa i le atunuu, ave foi le avanoa i le Komiti Faapalemene, e faatino le latou galuega, o le tatalo lea ma le faaaloalo.

FOFOGA FETALAI: Ia, ua maua atu le i usufono mamalu. Ia masalo o se taimi ona malele lea o le Minisita, le Minisita o Tupe lea ua tulai mai le Afioga i le Palemia, ae na ona faamanatu atu, o faiga na o lo o faapena ona faagasolo i ai ia le tatou galuega. Ioe, ae e i ai ia Tulafono o lo o faapena ona aumai i se tulaga faanatinati ona faapena ona paleni foi ma isi Tulafono i o latou taimi e amatalia ai ona faamamalu.

Ae e pei lava ona manino i le saunoaga a le Taitai o le Malo, a lea sa fai ia le tatou semina a tatou e faamalamalama ai ia le Tulafono lenei, o le tiute la o tatou o le Palemene, o tatou o le,, e pau lava lenei o le Maota e tau o sui usufono o le atunuu, we are the representatives of the country, o tatou o sui usufono e palota mai e o tatou itumalo. Ioe, o tatou foi o lea e saofafai i totonu o pulega a nuu, i fono a nuu, fono a itumalo.

O lea la e fai tatou ma sui usufono, e faamalamalama ai e latou o lo o faapena ona taiulu ma latou tapenaina ia lenei Tulafono, ma tuuina mai e le Kapeneta, ma tuuina mai e le Kapeneta i totonu o le Palemene, mo le pasiaina e le Palemene. Eleai la se vaiulu o tatou see ese ai mai le itu lea, ae ua mafua ona ou faatama mua sou lagona, leaga o le tiute lea o le Ofisa o le Fono. So o se Tulafono e tuuina atu i Komiti eseese o le Palemene, o le latou tiute lea e tusa ai ma Tulafono Tumau, e faasilasila ma faalauiloa i le atunuu.

Peitai, e nao tatou eleele lava ia na tumutumu mai ai le atunuu, a o Tulafono uma lava nei, ia e masalo e na o le toalua pe toatasi ia po o le leai foi, ae faafia ona faasalalau ma faasalalau. O le mafuaaga lena, leaga e maitau sese mai ma ave sese e le atunuu, ia o lona uiga la o le faiga lea o Tulafono a le Palemene. Ia ae ona o le puipuiga, o galuega ma faiga faavae, o lea e tatou te faagasolo ai.

O le mea la lea, ou te faamalulu i le sui usufono mamalu, ae ou te manatu, ia aloalo ese i tatou ma le mea foi lea e tau o le faaoloatauaaina o le finagalo o le atunuu, ia soso ese ma le agaga lena. Leaga a tuu le avanoa e talo le atunuu, o tatou o le atunuu, o tatou o e sa palota mai e le atunuu e o mai e fai tonu o le atunuu. Ia o le faamalamalama lea o le mataupu, o le a tuu atu i le.... malie le sui usufono, o le a le faia ia se ta fefaafinauaiga.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

Susuga Hon Laauli Leuatea Polataivao Fossie Schmidt: Ou te le o faaoloatauaina ia le atunuu ma le agaga faaaloalo.

FOFOGA FETALAI: Ia, malie le sui usufono se i....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, na o le pau lava le... lea lava ou te nofo ma vaavaai i le Tulafono, na o le 2 lava iuga e fai i le ituaiga Tulafono lenei, o le teena o le aafia o tatou i mo mea o le aafia i mo mea o tupe palapala, ia po o le talia o tupe palapala, ma tatou aafia i solitulafono faapea, e na o le 2 la iuga.

O le tetee o mea faapea o tagata solitulafono, e faaulu mai ia latou tupe i totonu ma aafia ai ma o tatou tagata, po o le talia. O le finagalo lea o le sui usufono e talia, ae o le fesili tuusao, o lou finagalo lea e talia? E pei o le tulaga lena lau Afioga.

Susuga Hon Laauli Leuatea Polataivao Fossie Schmidt: Lau Afioga e le o le tulaga lea. E le o le agaga lena o lou tulai atu lau Afioga. Lau Afioga i le Fofoga Fetalai, ia ave le avanoa i le tulaga masani i le Komiti Faa-Palemene, e soalaupule

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le mea e fia faasao, o le sui usufono lea sa Fofoga Fetalai foi. Ma o taimi uma lava e aumai ai ia Tulafono ua tasi ai le Kapeneta, ina ia faanatinati ai e i ai mafuaaga, mafuaaga o la e faatali mai ia faapotopotoga a le lalolagi. Ua uma foi ona faailo lena mea. Sa saofai i ina, malamalama lelei, ae lea ua tei lava ua le fia malamalama.

Susuga Hon Laauli Leuatea Polataivao Fossie Schmidt: Lea ou te malamalama lau Afioga i le Fofoga Fetalai, leai lava se mea e nenefu lau Afioga.

FOFOGA FETALAI: Ia, malie le sui usufono se i ou tau fesoasoani atu, malie le sui usufono mamalu o Gagaifomauga Nu.3 se malie le sui usufono. O le tatou galuega e fai faafeavatai. Sa ou i ina ae e iinei, foi au ae e iinei. Sa ou faaaloalo lava i lau Afioga, ou te le toia le va. Ioe, ae mafua ona faatamamua sou lagona, leaga sa e Fofoga Fetalai. E le i faapea na oo i lou taimi ae aumai tulafono faapea ona e fai atu lea, se le Kapeneta se i ave lava i le Komiti aua le faanatinatia. E leai. O fea sa e i ai? O fea sa i ai lou finagalo lena? O le ala lena. Se malie le sui usufono, leaga o le Tulafono Tumau a fai se faamatalaga a se isi....

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

Susuga Hon Laauli Leuatea Polataivao Fossie Schmidt: Lau Afioga e tumu i le ava atu i lau Afioga, e tumu i le ava Toleafoa, e tumu i le faaaloalo atu.

FOFOGA FETALAI: Ia, malie, leaga sa ou faaaloalo foi ia te oe...

Susuga Hon Laauli Leuatea Polataivao Fossie Schmidt: E tumu foi i le faaaloalo, a o lena e te silafia lou tulai atu. Ou te le o fai atu e teena le Tulafono, e leai. E avanoa talafeagai ina ia manino tagata e aafia i le Tulafono ae fai lo outou finagalo.

FOFOGA FETALAI: Malie le sui usufono leaga o le tatou Tulafono Tumau a fai se faamatalaga a le Nofoa e ao ona e alaala i lalo. Faafetai. Ia, o lea ua maua atu lou finagalo faafetai. Leaga ou te manatu i le tulaga lea, ioe. Leaga o lea sa e i i, o le mafuaaga lena o lea ou te popole ai, a o lea la ua e see atu loa i ina, o lea ua e tauai maa mai i i ma tusi mai lou lima i i. Ioe.

Susuga Hon Laauli Leuatea Polataivao Fossie Schmidt: Ou te le faia le mea lena o le tauaimaa ia te oe e sa. Toleafoa, ia e silasila i le ta va nonofo. O lou ava ma lou faaaloalo lena e te saofai ai i ina. Aua ne i galo ia te oe lau faaaloalo na avatu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e le pulea e se tagata se toatasi le Nofoa lena, o le mea e pulea e fulisia i ai le Maota lenei. Aveese le mafaufau lea ma oe ua fai lava si ou faamaualuga tele.

FOFOGA FETALAI: Ia, o le a ou le amanaia, leaga e fai mai Solomona, aua ou te tali atu. O le mea lea ou te faamagalalo foi Laauli, ou te faamagalalo ia te oe leaga e pei a e fuaao le Palemene. E pei e foliga o oe sa e tofia au i i. E leai, e le i tupu se mea faapena talu ona foafoa mai le Tutoatasi. A o lea faatoa ou faalogo lea i se sui usufono faamaualuga ua uma foi ona saunoa i se lafoga faapea. E ui i lea, ou te faamagalalo.

Ou te tapa le sui usufono mo Vaimauga Sasae.

Afioga SULAMANAIA FETAIAI TAUILILI TUIVASA: Faafetai i lau Afioga i le Fofoga Fetalai mo le avanoa. Ou te tulai foi ma lou faaaloalo e faaali foi se manatu ona o lenei Tulafono matagofie. E momoli foi le faafetai i le Afioga i le Minisita aemaise foi o le Minisita Lagolago, aemaise le Kovana ma le Pulega ma le Ofisa o le Tupe po o le tatou Faletupe Tutotonu i lenei Tulafono Tau Faaofi. Ou te faafetai lava ona o le mataala o le Minisita aemaise foi o le Kovana i nei ituaiga vaega faapenei maaleale.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

E avatu ai le faafetai ona o le aumai o lenei Tulafono tatou te silasila i ai ona o ituaiga teugatupe ma le faaaogaina o tekonolosi televavave. O le tele o tatou e le o malamalama, na o e lava o lo o galulue ai ma faatinoina nei auaunaga. Ou te faafetai lava i le tamaitai Kovana ona o le mataala i nei Tulafono ua aumai, ona ia mafai ona tatou tali atu ai, aua o tatou e fai Tulafono ae tatou te le iloa mea e tutupu i lea taimi ma lea taimi. Ae faafetai i le mataala o le afioga foi o lo o taiulu ai lenei faletupe tutotonu a le tatou atunuu i ituaiga vaega faapenei. E lagolagoina lava e lenei foi itumalo le Tulafono Tau Faaofi, ae pau lava na o ni nai fautuaga. A ou vaai i ituaiga faasalaga ia e tuuina i tagata nei, e le o taitai ona lava, aua o tagata ia e omai o tagata e sili ona atamamai. Ia o lea e avatu ai na o le tai lima tausaga pe tai selau iunite. O le a le mea e le tuu i ai se 10,000 po o se mea faapena ina ia aua ai ne i toe faia. Aua o le isi e ioe e sau lava tuli le faasalaga lima tausaga pe a faamaonia toe sau loa faaaoga le tupe lea sa... A o le tulaga sili ona ou tuualalo atu ai i lea Tulafono, ona o lea e pei e faamamafa le Tulafono i le Tulafono Tau Faaofi lenei, e pei e mamafa i le tuuina mai o tupe faaofiina mai i totonu. Ae ou te talosaga atu i le Afioga i le Minisita ma le Malo, e manaia ae tatou vaai foi i tupe e ave i fafo. Aua o lea e pei e lilifa le Tulafono i tupe e faaulufale mai totonu, ae se i tatou vaai i le tupe lea e alu i fafo, ona ou te lagolagoina lenei Tulafono Tau Faaofi....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea e aafia ai foi ma le vaega lena. O le tulaga foi o le 100 iunite, e \$10,000 Samoa. O lea lava ua atagia ai i le finagalo o lau Afioga.

FOFOGA FETALAI: Ia, masalo ua manino lau Afioga i le sui usufono mamalu.

Afioga SULAMANAIA FETAIAI TAUILIILI TUIVASA: Ia faafetai lava ua saunoa le tama o le atunuu, ia leaga o le tamaloa o le master plan le mea. O nai variations na e avatu e fesoasoani ai i le Tulafono Tau Faaofi.

Malie le sui usufono se i ou soso atu i le faaupuga lea. Se toaaga e faitau le tatou Tulafono Tumau. E sa nei saunoa faauigalua. Ioe. O lafoga ia, o lafoga faauigalua. Manaia le saunoaga a le sui usufono ae ;pai loa i le sailiili masei. A foi na ou fai atu ananafi, e te sailiili masei loa, o le mea lena a le tiapolo, ae le tuuaunoaina e le Malo. Ua ou manatu, leaga o lea o le a tuuaiina au pei foi lea o le a le faia lou tiute, leaga o le Tulafono Tumau o le mea lena a le Speaker. Ia o lea la ua ou fai atu, see ese mai upu faauigalua.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

Afioga SULAMANAIA FETAIAI TAUILILI TUIVASA: E leai se lagona o leni itumalo e faauigalua se faamatalaga. E ala ona ou fai atu, o le tama leni o le taitai faauuina mai le Atua. So o se mea e oo i ai le silafia o le tama lea, o le tama sa tofofi e le Atua o lo o i ai le faauuga. O le uiga lena o lau tala o le master, o le a oo i le tulaga lea....

FOFOGA FETALAI: Se i onosai mai le sui usufono. O le fesili ia te oe, na tofi oe e le Atua, na tofi mai lou faipule e le Atua pe leai?

Afioga SULAMANAIA FETAIAI TAUILILI TUIVASA: Ia, na tofi mai e le Atua.

FOFOGA FETALAI: O lena tonu la. Ia faaauau le saunoaga.

Afioga SULAMANAIA FETAIAI TAUILILI TUIVASA: E lagolagoina ona o lea ua faasee i le vaega lea o le Crime Act 2013 le tulaga e molia ai. Ua ou lagolagoina lea vaega. Na pau lava le mea, se i silasila ane i le tatou Matagaluega, aua pei o lea e faatino e le Matagaluega o Leoleo suesuega ia. Ia po o lava le tomai o l e Matagaluega a Leoleo e faatino ai auaunaga faapenei i soligatulafono nei. O le isi o vaega i lau vaavaai i ai i le teuteuga o leni Tulafono Tau Faaofi, pei o lea ua tuu ai le power i le kovana na te faatinoina ai le tulaga foi lea... a o lea ua aveese le tulaga lea sa i ai le faamasinoga. Ae pei o lou ia lava naunautaiga, pei o le faamasinoga o le iuga lea. Ae o le fai faanatinati ta te lagolagoina, e faatino pea le auaunaga a le Matagaluega i lalo o le faatonuga a le kovana, ae pei o le power lava ma le mautu o ana faaiuga e aumai le faamasinoga.

O le tax evasion, e lagolagoina, tasi lea vaega lea na saunoa i ai le tatou tama i leni taeao, o le tele o atunuu o lo o lolofi mai i le tatou atunuu ona o lo o mama teugatupe o lo o i ai i totonu, o lo o ala mai le atunuu le tulaga o le... o le mea lena e ala ai ona fia omai i le tatou atunuu e le gata i le malupuipua a o le ituaiga mea foi leni o le tax. Aua e leai lava se isi e fia togi lafoga, ae ala ona omai tagata ma lolofi mai kamupani mai fafo ma i latou ona o lo o i ai se vaega faapea ia i tatou, e le gata i le puipua o latou tupe, a o lo o lelei foi, a o lea ua i ai ma le tax evasion, aua na o le tax avoid lea e i ai, ou te matua lagolagoina lava. Ia galulue faatasi ma le Matagaluega o [Tupe Maua ina ia maua ai i latou lea e faatinoina lea auaunaga.](#)

O se isi foi vaega e pei e popoe lava lou sui usufono i le tulaga o tupe lea e avatu i fafo. Saunoa lo tatou tama, le taitai o leni atunuu o lea o le a aumai le masini lea e le Matagaluega o Tupe Maua. Ou te matua faafetai lava i le Atua ona o le tele o tatou lea e agai i fafo e vaai ifo i le malae vaalele, o lo o faaoga lava nai securities foi na i le malae vaalele e o atu tuu i luga lou aao ae tuu mai le masini i lalo, ae le o malu le puipuiga lea e manao e ave oe i totonu o le potu, e masalomia loa ave oe i totonu o le potu se i tulou lava e matua sailiili oe i totonu o le potu.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

Ia i ai le faatagaga e avatu ai le tiute ma i latou e faatinoa, sue oe i totonu o le potu. Ua ala ona i i le masini ona o le mea foi lea o le fusipau, a o la e saisai le tino i tupe. O le popolega o le sui usufono o le ave o tatou tupe i fafo. Faafetai o lea ua oo i ai le kovana i le mea lea o le ave i lalo i meli, o lea ua i ai masini a le Matagaluega o Tupe Maua e faatino ai, leaga e a? Na o le omai lava o latou nei eli eli tupe i inei, ave i fafo, ave i fafo. A o fai ni mea i totonu o Ekalesia ma nuu? E pei la o le agaga lena, e lelei le omai o nai tagata nei e atinae si o tatou atunuu, a o le tupe lea e ave i fafo lea e matua popole ai lenei sui usufono.

O le tulaga i le suetusi, e leai o latou lava o lo o i ai le tulaga tomai i le faatinoga o lenei vaega. Ona faapea lea lau Afioga i le Fofoga Fetalai, e lagolagoina e lenei itumalo le....ae na o se matou faapipii atu pe maua se avanoa o si ou itumalo, o lea ua outou faafofoga o lea ua lafo i le la itu i le Palemia ma le Kapeneta se sao o le tatou itumalo aua le tufatufaina o le keke sa saunoa i ai. E faamalulu atu afai foi e i ai ni mataupu ua le oo i ai le talanoa a lo outou sui usufono, se tatalo, e manaomia lava le tatalo. E leai lava se mea faigata i le Atua.

Lau Afioga i le Fofoga Fetalai, ina ua tofia le tama lea o Loau e le Palemia e avea ma Minisita, o le tele ia o tagata sa faitio, faitio, ona o le a? E iloa lelei lava e le atunuu e leai se agavaa faa-Minisita o ia Loau. Na pau le tagata la e na vaai i ai le atunuu faapea e ave i ai e le Minisita le tofiga lea mo Aoga, o Masters ma mea faapena, o PhD po o doctors, faapea e ave i ai le tama lea o Leala ona o le tama sa CEO i le Matagaluega, o ia lea sa pule i le AA, o le lima taumatau lea o Palusalua sa i ai. Faapea la tagata e ave i ai lea, ae a? E ave lava le auauna faatauva. Ua a nei? Lea ua ea le Matagaluega o Aoga, lele e le selu atu leaga o tagata e omai i totonu o nuu. Ae faanoanoa i nisi o Minsita fai mai e fai mai tou fagogo. O ni faipule e omai e fai mai i ai ni tou fagogo faipule nei? O lea foi e lafo atu ni o matou manatu, o lea e faalogologo le itumalo. Pe fai o matou auala pe le faia, o le omai i totonu o le Palemene e le i omai i ni faiga auala, e omai i tofiga mai le Atua. Lau Afioga i le Fofoga Fetalai, se leaga e u tau i le pau le saunoaga a Minisita. Leai o Vaimauga e omai o auauna a le Atua, o le tofi mai le Atua.

FOFOGA FETALAI: Faafetai. Leaga e le o lavea... Ua maea le taimi o le sui usufono.

Ia se i tulai mai le Afioga i le Minisita mo Galuega, Felauaiga ma Atinae Eseese.

Se i tautuana ma sui usufono mamalu, se i vaavaai ifo i le lua va sootuli ma le isi sui usufono lena e tau lavea i ou aao i lou soona avaavau ma.. ona le maua ai lea o le autu ma le aano o lou finagalo. Ae se i tulai mai le Minisita mo Galuega, Felauaiga ma Atinae Eseese.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Faafetai mo le avanoa i lau Afioga i le Fofoga Fetalai.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

E maitau atu i le sui usufono mamalu ua avaavau ma pei e ita, ae sa e fesili i ai po o ai na tofia ia ae tali mai na tofia ia e le Atua. E le o se tagata o le Atua le tagata lea. O au sa faia le upu lea o le fagogo ona sa ou mana'o foi e sui ni upu e faa'oa i totonu o le Maota. O le uiga o le fagogo o le tala tuusao e uiga i mea nei o auala galue ma le tulaga sa ou ulufale mai ai i le Palemene, o lea ua 17 tausaga, e leai ma ni auala galuega i le taimi sa ou saofai ai foi i le Palemene. O lea ua fa'atoa amata ona fai ni auala galue e tau ai foi lou nei sui usufono. A o le tulaga lena na avatu ai le fagogo se i faatupu manatu i sui usufono, tatou te le malo i ni auala galue. O lea la o auala ia na aumai uma ananafi, o le a kolosi uma lava i lau lisi. Faafetai.

FOFOGA FETALAI: Malo. Ia se i tulai maia le sui usufono mo Alataua Sisifo. Malie le sui usufono....

Afioga ALIIMALEMANU ALOFA TUUAU (Alataua Sisifo): E faatalofa atu i lau Afioga i le Fofoga Fetalai faapea le Afioga i le Palemia, o le Aiga Kapeneta faapea Miinsita Lagolago. E le gata foi i lea o le mamalu o sui o Komiti Faapalemene, o Faauluuluga ma sui o Matagaluega faapea le Failautusi o le Fono ma le au'au'auaga i lenei taeao, aemaise lava Samoa o faafofoga tapuai mai. E ese le matagofie o lenei aso, ua tatou aulia ma le manuia ma faa'oopoo i aso o le tatou ola i lenei lalolagi.

Ae ua ou tulai, e le o se fesili ae lagolagoina le Tulafono ona e fesootai ma le tulaga tau tupe. Sa tele ina maua i nisi o saunoaga a sui usufono le atugaluga ona o tupe foi nei e aumai faanana i totonu o le atunuu. O le lagolago la i le Tulafono lenei ona o lea e faamausali ma faamalositia ai taiala e tatau oan mulimulitaia ma faatinoina foi le puipuiga o nei ituaiga solitulafono. Sa maua e matou nei sa i ai i le folasaga a le tamaitai Kovana, ua tolu tausaga talu ona tapena galuega moomia e faatino ina ia pasia ai le Tulafono lenei, e i ai le a'otauina o le Ofisa o Leoleo, o e o le a faatinoina. E i ai ao'oga mo le Samoa Port Authority aemaise le customs on boarder cash reporting, po o le taumafai lea e lipoti atu i le tulaga lea pei ona moomia ae faapea foi le au'au'auaga a le vaega lea o le Western Union, o e o lo o faia le au'au'auaga lea o le aumai ma le ave i fafo o tupe e faapena foi le task force ma le national strategy. E tele tele au'au'auaga e fesootai uma galuega, ma i le matou maitau atu i ai, ua uma ona tapena uma le tulaga lea, ua uma ona build le capacity. Ae pei o le agaga lea e ala ai ona lagolagoina foi ma lagolagoina le tulaga faanatinati, ona e tatau lava ona tatou ausia requirements, ausia taiala lea ua uma ona fa'ataatia mai e le Asia Pacific Group. Ona o tatou o se sui o le Faalapotopotoga lea.

O lea ua uma ona taua e nisi o sui usufono le tulaga lea i le masini po o le scanner a le Matagaluega o Tupe Maua, lea e mafai ai ona detect ia ituaiga gai'oiiga pe a faapea lena e aumai faanana po o a lava isi ituaiga faiga faasolitulafono.

22 IUNI 2018

Tulafono Tau Faaofi o Teuteuga o le Tulafono o Puipuiga Mai Tupe Faaofi Mai Faasolitulafono 2018 – faitauga faalua

Ou te talitonu la, ua talafeagai lelei le tuuina mai o le tulafono lea ma le i ai foi o ia masini, e faaoga i le faatinoina o lenei tulafono. O itu taua e lagolagoina ai le tulafono ia vave ai ona molia i latou e masalomia e le Ofisa o Leoleo.

E lagolagoina foi le tuuina atu o le avanoa i le tamaitai Kovana na te molia vave ai i se taimi vave, pe a oo ina matauina ua i ai se solitulafono lenei. Aua a tuu i le ofisa o faamasinoga. O lenei ua tatou iloa ina lelei lava le tele o le process o mea e tatau ona ausia muamua faatoa oo atu se mataupu i le faamasinoga. Ua fetau lelei ai lava le tuu i le ofisa o leoleo e molia sao ai. Aua e pei ona faamalalamaina, sa i lalo o le isi tulafono lea sa i ai, sa le mafai ai ona latou molia sao loa, pe a latou mauaina nisi e aumai faasolitulafono ia tulaga. Ae ua fetau loa le tuu i lalo o le ofisa o leoleo, e fetau foi le tuu i le tamaitai Kovana o le avanoa, ina ia mafai ai ona faatino vave ia tulaga. Ao le mea taua lava, ia vave ona tatou meet ia standards ia e manaomia mai e le vaega lea o le Asia Pacific Group. E pei foi ona tatou maua i lenei vaiaso i saunoaga a le Palemia, i tupe ia e talosaga e aumai faameaalofa, po o grants, ma le taua o mulimulitaia e le tatou atunuu o taiala. Aua e le mafai ona tuuina mai e tatou paaga ia tupe, e vagana ua i ai la latou talitonuga, o lea e i ai taiala maumaututu e faamalosi ai, le aua le faaoga le tatauina, pe aua foi nei faia i se tulaga faasolitulafono. A tatou meet ina ia standards ia, ua tele le faatuatuga ma aumai ai pea ni tupe e fesoasoani i le atinaeina o lo tatou atunuu.

O le manatu lenei ua ou tuai atu ai e lagolagoina le tulafono. Faafetai mo le avanoa.

FOFOGA FETALAI: Malo faafetai. E manatu toe pau lea o le saunoaga e tulai mai mo lenei tulafono ona avatu lea o le fesili ma faagasologa o la tatou galuega.

Tulai mai le sui usufono mo Salega i Sasae.

Tofa OLO FITI AFOA VAAI (Salega Sasae): Faafetai i lau Afioga i le Fofoga Fetalai. E le umi foi nai vaivaiga o lenei itumalo e tusa ai ma lenei tulafono taua.

Lau Afioga i le Fofoga Fetalai ua ou tulai atu ma le agaga faaloalo. E avatu le faamalo ma le faafetai i le Afioga i le Palemia, ua manino auofala i le tulaga i le tulafono ma lona faamoemoe. Ae na pau lea o se mea o lo o agai i ai se vaivaiga o lenei itumalo, po o le a la le tulaga sa i ai, ao lenei aumaia le tulafono lenei. E foliga mai o lea faatoa aumai le teuteuga, faamalosi ma loka ai tulaga faapea, e pei ona aumai i totonu o le tulafono. O lona uiga na ela le silasila a lo tatou Malo i ia mau i tausaga ua tea. E avatu ai la le fautuaga i lau Afioga i le Palemia, ua tatau la ona tatou silasila e tapena lelei ia vaega ia. Aua o la tatou Matagaluega o Leoleo e pei o la foi e le o lava le aufaigaluega e faatinoina le mea e tulai mai.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

FOFOGA FETALAI: Malie le sui usufono sei tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o lea faatoa fai nei le tulafono lea, o lea e toe teuteu. O lea sa ou faamatalaina atu le faaaogaina foi o isi malosiaga, lea sa taofia ai le Kamupani lea e tasi mai Amerika Samoa. E lei faapea la o se mataupu sa faaleiloga. Leaga sa faasalalau i nusipepa le tulaga lea, o lona uiga e le faapea na taofia ai le vaai totoa i tulaga ia e pei ona ou tauina atu. E i ai le teuteuga lea e faasino i Kamupani faamavaega, o la sa ia latou le tiute latou te siakia, ma o mea lava ia sa masani ai ituaiga pisinisi faapenei. E manatua foi o ituaiga pisinisi faapenei, e tele naunau le tauva, e i ai le tatou pisinisi faapenei. E i ai le pisinisi faapenei a le atunuu lea o Vanuatu. O Vanuatu o le isi lea na mua i malae i le tatou pasefika. E i ai foi la le mau pisinisi faapenei i Caribia, e o la i ai le toatele, ao tatou e pei e fou atu i le tausaga e 1992. E fou atu tatou, o le eseese la o tatou, e pei sa o tatou faaaogaina le tulaga lelei ua faia e isi jurisdictions, o isi pisinisi a nai isi Malo, ua tatou alofia le anoano o le mau faaletonu sa i ai. O le tausaga e 1973, sa ma o ai ma le Minisita o Tupe i lena vaitaimi o Sam Sails. Na ma o e faatalanoa ma pulega o ituaiga pisinisi ia i totonu o Vanuatu. O le agaga sa i ai i le vaitaimi lena, e fai foi se tatou pisinisi faapea e maua ai tupe faaagaga mo fefaatauaiga a le atunuu, ae toe maua ai foi ma tatou teugatupe, e faaoga e le Malo e faatino ai ana atinae.

Ona sau sau lea e lei taunuu i se tulaga lelei, toe faatalanoa lea ma le tatou Malo ma nisi foi sa latou faia pisinisi faapenei i le 1985, ona faaaau ai lava lea o feiloaiga nei i le 1986, 1987, ona faia ai loa lea o le faaiuga, o le a fai se tulafono. Ona fau ai lea o le tulafono i le 1987 ae faatoa faatino i le tausaga e 1992. O lona uiga la, e tele lava tapenaga sa fai, ae o uiga ia o Malo tau atiaie, e vaavaai i faiga eseese, e mafai ai ona sue tupe a le atunuu e faatino ai ana galuega fai. Ona tuu itiitia ai lea o le faalagolago tasi i mea nei o lafoga, ona o le tatou atunuu e le toatele foi ni tagata e mafai ona tapa, e sue mai ai a tatou tupe e faatino ai a tatou galuega.

O le ala foi lena o lea tatou te toto ai i atunuu i fafo, e faatalosaga ni a latou foai, ma tatou o e fai a tatou nogatupe e mama tului.

Lau Afioga i le Fofoga Fetalai, o le faamalamalamaga lea, o lea lava sa i ai le **vaega o le tulafono, ao lea ua toe faamalosi atili. Ae e mafua ona o le tulaga** lea ua i ai le lalolagi i le taimi lenei, ua auala eseese mai le anoano o le mau solitulafono. Aemaise lava le taimi lenei o le tulai mai o mea nei o fesootaiga televavave e pei ona silafia, ia o lea ua iu lava ina oo le maemae o isi, i le tala mai o au tupe i totonu, ae o atu nana mai le masina iina e pue ai lau numera. E te alu ese mai oe, ae tala e latou ia. O ituaiga solitulafono na ua matua tele le mau solitulafono eseese e tatau ai ona fesuisuia foi a tatou tulafono, ina ia aua nei mamao tele i tatou i tua. Ae o mai latou mai fafo e i ai le tomai faasolitulafono lea, ona taaalo ai lea i inei. O le toatele lava la o tagata faapena, e le umi lava ona i inei ae maua.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

E i ai le isi tagata na sau, ona book lea o lona potu ia Aggie Grey ae nana ana masini i le isi potu, e lua la potu. Ae te i loa ua pue mai e le tatou central bank le US\$100 na avatu e tala, ma tatou foi currency. Ae maua ai i ina, o mea pepelo. Ae matua moni lava i le vaai a tagata na te le iloa le eseese, seiloga ua avatu e tuu i totonu o masini ia ona pue mai loa lea i ina. E le i umi lava ona gaoioi leoleo ae maua, ae maua atu o le isi tagata mai fafo o la e nofo ia Aggie Grey, e hire le isi potu ae tuu ana masini i le isi potu e gaosi ai le mau \$100, e le gata la o tupe iinei a o tupe foi i fafo.

Lau Afioga i le Fofoga Fetalai, o le tulaga lena, e tataua ona mataala i tatou i taimi uma. O lea la e aafia ai uma tupe e sau mai fafo ma tupe e alu atu iinei e alu i fafo. O le ala foi lena, a e faatumua le pepa lea pe a e malaga, o la e i ai le fesili, po o fea le atunuu, aemaise o Amerika. E fia le tupe na e te sau ma oe? E ova loa i le \$10,000 amata loa ona maati le vaai ia oe, e te le iloa la ua amata ona maka oe.

E i ai le isi tagata e \$100,000 le tupe na sau ma ia, e na te le iloa o lea ua pick up e i. Ona sau lava lea iinei a o lea ua logo leoleo i le tulaga lena. O lea e i ai i totonu o Samoa nei, le ofisa o solitulafono faavaomalo, sa i Fiti ae ua ou le iloa pe ua sefulu ea tausaga. E tele lava mea faapena o lea e under-microscope, e le o silafia lava la e tagata o lea o lo o i ai le tatou vaega lena, latou te vaai solitulafono ma faavaomalo, aemaise o latou nei e malaga mai ma i latou e malaga ese atu. O puipuiga lena o lo tatou atunuu mai mea ia, o soligatulafono ia e faaoga i ai tupe feaveai, i le va o lea tuaoi ma lea tuaoi.

FOFOGA FETALAI. Malo faafetai. Le sui usufono mamalu o Salega Sasae po o ua maea lau saunoaga....

Tofa OLO FITI AFOA VAAI: E pei lava ona avatu se vaivaiga foi o lenei itumalo i tulafono taua maaleale faapenei a lo tatou atunuu. E ao lava ona tapena lelei ia puipuiga. E na o se lagona vaivai e avatu ai se tuualalo. Ua tataua foi ona tatou tilotilo i se tatou FBI, ua lava ni nai leoleo se toalua e aoga faapitoa lava i mea ia, leaga e fai lava si maaleale o le vaega lea. Afai o lea ua tatou oo i le tekonolosi fou, ua tataua foi ona tatou amata ai i le mea lena. Ona o tulaga lava ia i le puipuiga o lo tatou atunuu i tulaga o faavaomalo faapea, ua tataua ona atoatoa se tomai ia tatou leoleo e fai ai lea galuega. E le gata foi i lena, ae manaia foi e aumai e maua ai le check and balances, ma leoleo o lo o tatou ofisa o leoleo. Aua o la e alu lava leoleo latou ia e sao lava latou ae tataua foi ona i ai le vaega lea e aoga i i ae toe aoga foi i tulafono e pei ona tulai mai.

O le isi vaega e pei ona taua e se tasi o sui usufono, e manaia o lea ua manino mai, o lea e aafia ai ma tupe ia ave i fafo. Aua o tatou tulafono lava ia so o se tupe maua lava e tataua ona tax. O le tele o tatou kamupani ma pisinisi lea e i ai nei, o le tele o tupe e teu i o latou aiga ae le teua i le bank e tau maua ai sina a tatou tupe a lo tatou Malo. E tasi la lena ituaiga tupe faapena lea e talanoa i ai le tulafono.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

Ae faafetai o lea ua aumai le tulafono e faasa ai le tulaga i le aofaiga e ave ai ituaiga tupe ia. Ae silasila ifo i te i ua auauai atu le aiga e tofu lava latou ma le \$20,000 e lafo i le taimi e tasi, ae eseese. O nai mea faapena foi lea e avatu ai se fautuaga.

Ma le mulimuli lau Afioga i le Fofoga Fetalai, o se fautuaga lea i lau Afioga i le Palemia. O lea na e taua faapea o lo o tatali mai Faalapotopotoga o le ala lena ua faanatinati ai le tatou Tulafono. Ao se tuualalo lava, e le manao foi lenei itumalo e tatali faa'ia matau a tatou fuafuaga, mai manaoga o tatou Faalapotopotoga mai fafo. O le ala foi lena e tatau ona tatou soalaupule ma fai faalelei.

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr Sailele Malielegaoui: Lau Afioga i le Fofoga Fetalai....

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neiotei Aiono Galumalemana Dr. Sailele Malielegaoui: Faamalulu atu i le sui usufono, o mea nei o tulaga faavaomalo e noatia i tatou i Malo uma lava. E noatia i tatou ia tatou feagaiga e fai. Ae e i ai le itu taua o mea ia, ae mo le puipuiga. O le ala foi lena, e le o pogisa tatou. E oo lava i Malo tetele, e noatia uma ai lava latou i ituaiga transactions faapenei. O le ala lena e ala ai ona tatou o i Faalapotopotoga avea i tatou ma sui o le Faalapotopotoga. E noatia ai i feagaiga faavaomalo. A oo la ina noatia oe i feagaiga faavaomalo, e i ai le tiute a oe e tatau ona fai. E leai lava se mea e ese ai ma Faalapotopotoga Tumaoti le aulakapi. A e auai i se aulakapi, o la e i ai tulafono e noatia ai oe i le Komiti o lakapi. O le mea muamua, ia fai lau amiotonu, ae e te solia loa le mea lena, fafo ma le maafala, a. O le tulaga la lena a e sainia loa feagaiga, e te i totonu o se faalapotopotoga, mo se faaitaiga o se faalapotopotoga a le Malo Aafaatasi, e i ai foi la puipuiga i totonu o Malo Aafaatasi, ua e vaai atu i ai ia Amerika, o le Malo tele ma le Malo o Saina, e tiga lava po o le a le tele o latou meatau e paoa i le lalolagi ae e te saofai loa i i ae fai sau mea sese, e le aveesea lava upu e talau ia te oe, ona ua e solia mea o feagaiga ua uma ona osia.

FOFOGA FETALAI: Malo faafetai. Ua manino auofala e tusa ai o lou finagalo. Masalo ua see ese ua maea lou taimi.

Tofa OLO FITI AFOA VAAI: Ia pau lava lena o le tuualalo, faafetai i le Afioga foi i le Palemia, aua o lea e faanatinati mai, ia ua ta fīu tau tope atu lau faitau i nai minute ia....

FOFOGA FETALAI: Ia o le faalavelave leaga e tatou te le i semina. O lea sa ou musu e avatu. Ia tulai mai le Afioga i le Palemia.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe
Faaofi Mai Faasolitulafono 2018 – faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le Tulafono nei o le matua pae lava o le Tulafono, e le o se Tulafono tele, a o lea foi na manino foi le faamalamalama i le aso fonu ma Faauluuluga o Matagaluega. E le o se Tulafono mafiafia, ou te manatua pe tai 3inisi le tele o isi Tulafono na aumai muamua, a o le tamai Tulafono lenei, ou te ofo i lou le malamalama, masalo matua tele lenei taimi na amata mai ai le tatou fonotaga i le taeao lenei, o oe le isi toe ulutaia o le Maota lenei. O le tulaga masani lava, e sa sa ona lua ni nofoaiga a se isi, ae ua tele au nofoaiga. E tataua lava ona e malamalama i mea sa tatou omai ai, a o lea lava e te le fia malamalama.

FOFOGA FETALAI: Malo.

Tofa OLO FITI AFOA VAAI: Lau Afioga ua faauma atu ai loa. E le fesiligia lava le tofamamao a le Afioga i le Palemia ma le Kapeneta i tulaga o mea faanatinati faapea, e fai ai e i latou ia faaiuga mo le tatou Palemene. A o le tuualalo lava, e ao lava ona soalaupule aua e maua penina i tifa e atia, e avatu ai so matou leo i inei, pe matou te le auau, ia na ona fesoasoani atu, ma le agaga faaaloalo faafetai.

FOFOGA FETALAI: Ua maua atu le finagalo o le toe ulutaia o lona itu o le Maota. Ia pe i ai se isi faaopoopoga o le saunoaga a le Malo po o lea ua uma ona faamalamalama uma mea e pei ona e malele aua o le tulai mai pea ma faamalamalama.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ou te lagona ua leai se isi faamalamalama. Mo le silafia, o tupe uma e maua mai i le vaega lea, o lea e faatupe ai le tatou Tala o le Tupe, e le gata la i le tele o le latou fesoasoani o lea e faatupe ai le Tala o le Tupe a le tatou Malo i le atunuu, a o le vaega lea e fesoasoani i le tatou taaloga, lea e avatu ai nai seleni e taaalo ai le Au Lakapi ia ma le anoano o isi mau faalapotopotoga ia e faagasolo nei ia latou tauvaga. O le tele ia o le aoga o le Faalapotopotoga lenei, aemaise lava mea nei taaloga, ae le taua ai la le tele o le latou fesoasoani lea e aumai i totonu e faatupe ai le tatou Tala o le Tupe.

Lau Afioga i le Fofoga Fetalai, e toe pau lona o sau toe faaopoopo atu, ina ia malamalama lelei ai le Maota i le faafogafoga mai.

Na faamaonia le lafo ma faitauina le Tulafono Tau Faaofi o Teuteuga o le Tulafono o Puipuiga mai Tupe Faaofi mai Faasolitulafono 2018 i lona faitauga faalua.

22 IUNI 2018

**TULAFONO TAU FAAOFI O TEUTEUGA O LE TULAFONO O
PUIPUIGA MAI TUPE E FAAOFI MAI FAASOLITULAFONO 2018
– iloiloga auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua teuteuina le fuaiupu 2.

Faamaonia.

FUAIUPU 3: Ua faaofiina fuaiupu fou 3B ma le 3C.

Faamaonia.

FUAIUPU 4: Ua teuteuina le fuaiupu 7.

Faamaonia.

FUAIUPU 5: Ua teuteuina le fuaiupu 8.

Faamaonia.

FUAIUPU 6: Ua teuteuina le fuaiupu 13.

Faamaonia.

FUAIUPU 7: Ua suia le fuaiupu 16.

Faamaonia.

22 IUNI 2018

**Tulafono Tau Faaofi o Teuteuga o le Tulafono o Puipuiga Mai Tupe e
Faaofi Mai Faasolitulafono 2018 – iloiloga auiliili**

FUAIUPU 8: Ua faaofiina fuaiupu fou 16A, 16B ma le 16C.

Faamaonia.

FUAIUPU 9: Ua faaofiina le fuaiupu 21A fou.

Faamaonia.

FUAIUPU 10: Ua faaofiina le fuaiupu 23A fou.

Faamaonia.

FUAIUPU 11: Ua faaofiina fuaiupu fou 25 ma le 26 o le Faamatalaga 1.

Faamaonia.

FUAIUPU 12: Teuteuga faatupulaia.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

**IGOA: Teuteuga o le Tulafono o Puipuiga Mai Tupe e Faaofi
Mai Faasolitulafono 2018.**

Faamaonia.

*Na faagasolo le Tulafono Tau Faaofi o Teuteuga o le Tulafono o Puipuiga
Mai Tupe e Faaofi Mai Faasolitulafono 2018 e aunoa ma se Teuteuga.*

22 IUNI 2018

**TULAFONO TAU FAAOFI O TEUTEUGA O LE TULAFONO O
PUIPUIGA MAI TUPE E FAAOFI MAI FAASOLITULAFONO 2018
- faitauga faatolu**

**Susuga Hon TUILAEPA AUELUA FATIALOFA LUPESOLIAI
LOLOFIETELE NEIOTI AIONO GALUMALEMANA Dr. SAILELE
MALIELEGAOI:** Lau Afioga i le Fofoga Fetalai ou te faatu le lafo, *Ina ia
faitauina nei le Tulafono Tau Faaofi o Teuteuga o le Tulafono o Puipuiga
Mai Tupe e Faaofi Mai Faasolitulafono 2018 i lona faitauga faatolu.*

Faaluaaina e le Sui Palemia ma le Minisita mo Pisinisi ma Alamanuia.

*Na faaamaonia le lafo ma faitauina le Tulafono Tau Faaofi i lona faitauga
faatolu ma faapea ona pasia le Fono Aoaio Faitulafono.*

**TULAFONO TAU FAAOFI O TEUTEUGA O LE TULAFONO O
AOGA 2018 - faitauga faalua**

**Afioga Hon LOAU SOLA KENETI SIO (Minisita mo Aoga, Taaloga
ma Aganuu):** E faatalofa atu i lau Afioga i le Fofoga Fetalai i lenei taeao
matagofie. E manatu foi e talii ae popoe i lenei taeao, aua e momoe a ma
manu ae sau mala e atiai, peitai o lena ua e sii le viiga ma le faafetai i le Atua
aua lenei taeao ma le fesilafaiga a le Maota nei. A ua ou tulai atu ma le ava
tele lau Afioga i le Fofoga Fetalai e faatu le lafo, *Ina ia faitauina nei le
Tulafono Tau Faaofi o Teuteuga o le Tulafono o Aoga 2018 i lona faitauga
faalua ma ou te fia tautala faamalamalama i ai.*

*Faaluaaina e le Minisita mo Faamasinoga ma Pulega tau Faamasinoga,
Minisita mo Tupe Maua ma le Minisita mo Fesootaiga ma Faamatalaga
Vavave Faaneionapo.*

FOFOGA FETALAI: Ia ma ou te tapa lau Afioga i le Minisita mo lau
saunoaga faamalamalama.

Afioga Hon LOAU SOLA KENETI SIO: Faafetai i lau Afioga i le
Fofoga Fetalai. E manatu foi o lenei Tulafono o le Tulafono Autu o Tulafono
Tau Faaofi 2018 mo le teuteuina o le Tulafono o Aoga 2009. O le sini o lenei
Tulafono Tau Faaofi ma nai teuteuga nei, e manatu le Matagaluega ua tatau
ma onomea lenei vaitau pe a fua i ai i le 2009 i le 2018 i le tele foi o nai
fesuiaiga ua faapena ona tilotilo i ai le Matagaluega aua le agai i luma, lea la
ua faatulaga mai ai nai suiga nei ina ia faapena ona faamaonia e le Fono
Faitulafono. E ono nai suiga laiti e pei ona tuuina mai, ia suia le tausaga. E
mnanatu foi o lena ua uma ona soalaupule ma feutagai i ai ma silasila mamao
foi i ai le paia o le Palemene pei ona i ai le aso ua mavae atu po o le
fetuunaiga foi aua le faamalamalamaina o le Tulafono.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

E 10 tausaga e faamalosiā ai le auai o fanau i aoga, compulsory school age i le fa tausaga i le aoga amata ae lima tausaga agai le 16 tausaga i aoga tulaga lua ma kolisi, primary and secondary schools. Ia faapoopo le numera o le pepa fanau mo le faauluina o fanau i le vaega 11. Sui le faaupuga aoga a le Matagaluega i le aoga a le Malo ina ia tasi le faaupuga e faaoga. Sui le vaega 7(2) ina ia faaupuina faapea, tamaiti e i ai aafiaga tumau o le soifua po o le disability. Sui le vaega 23(3) ina ia faamatalaina faapea, e mafai e se faiaoga i se kolisi ona faaoga le malosi talafeagai, reasonable force pe a mautinoa e tatau mo le puipui o le saogalemu o fanau aoga. Ma le vaega mulimuli, ia sui le vaega 24 ina ia manino le faasaina ona taumafa po o le umia e faiaoga ma tamaiti aoga o se ava malosi, tapaa ma fualau faasaina i totonu ma fafo o le aoga i taimi o aoga.

Lau Afioga i le Fofoga Fetalai, e pei o nai teuteuga ia e ono aua le Tulafono Autu. Ua teuteu le Vaega 2 o le Tulafono e sui ai tausaga e faamalosiā ai le auai o fanau i aoga. O le lelei ma le anoa o aoaoga i so o se vaega o le atunuu e mafai ona ausia pe afai e amata le ola aoaoina o fanau i totonu o aoga amata. O le taimi nei, e le o faatulafonoina tausaga aoga o fanau i aoga amata, peitai, o le laasaga moomia tele lea ina ia faamautinoa ai le lava tapena o fanau a o le i ulufale atu i le uluai tausaga o aoaoga i aoga tulaga lua ina ua atoa lo latou lima tausaga. O le tausaga faatulafonoina ia maea ai aoga a fanau i aoga maualuluga o le 14. O le suiga o tausaga faatulafonoina e maea ai aoga a fanau i aoga maualuluga i le 16, o le taumafai lea ina ia maua uma e fanau ia avanoa e faamaea ai i aoaoga faapea Iunivesite aemaise le maua o ni galuega lelei mo le lumanai.

O le fuaiupu 2 lau Afioga, e sui le faaupuga Aoga a le Afioga ma Aoga a le Matagaluega ma Aoga a le Malo. O lenei suiga ina ia tasi ai lava ia le faaupuga e tau ai o Aoga a le Malo.

O le vaega 3 lau Afioga, sui le vaega 7(2) ina ia faaupuina faapea, tamaiti e i ai ia aafiaga tumau, o le soifua. O lenei suiga ina ia o tutusa ma le faaogaina ua i ai ai nei, mo i latou e i ai le aafiaga o soifua, e le gata i Samoa nei ae o atunuu i fafo.

Fuaiupu lona 4 lau Afioga, ua faapoopo le nuu e nofo ai ma le numera o le pepa fanau, ma le faauluina o fanau i aoga i le vaega 11. Maitauina pea le tele o le fanau, e oo lava i aoga maualuluga e leai ni pepa fanau ma ua aveā lea ma faaaitaui i taimi e faamautu atu ai numera resitala o tamaiti aoga ina ia mafai ona tulimatai e le Matagaluega ia le faagasologa o le latou ola aoaoina lau Afioga.

O le 5 ua sui le vaega 23(3) e faapea, e mafai e se faiaoga o se aoga maualuga ona faaoga le malosi talafeagai, reasonable source pe a mautinoa e tatau e puipui mai ai se tamaititi mo le soli o se Tulafono, e lamatia ai lona saogalemu faapea le saogalemu o isi tamaiti aoga.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

E le o faatagaina e lenei teuteuga le faatinoina o le faasalaga foi lea o le corporal punishment, ae o le avanoa e faatagaina ai faiaoga o aoga maualuluga po o Kolisi, ona faaoga ia le malosi talafeagai pe a mautinoa e tataua le puipuiga mo le faaitiitia o ni aafiaga, mo le saogalemu o tamaiti uma e aofia ai e lo o faatinoina le amio le pulea. Puipuiga mai o tamaiti mai amio e ono oo ai lava i ni solitulafono, puipuiga o tamaiti mai ni amioga le pulea, le mafaufau ma taufaamataua. Ia lau Afioga o le faamalamalamaga lena.

Ia ma le fuaiupu 6 ua sui ai le vaega 24 ina ia manino le faasaina ona taumafa ma le umia e se faiaoga po o se tamaititi aoga o ava malosi tapaa ma fualaau faasaina, i totonu ma fafo i le taimi o aoga. Ona o le ogaoga o nei faafitauli ua tulai mai, ua faamaonia le aafia ai o tamaiti aoga i le faaaogaina o fualaau faasaina. Tapaa ma onana i taimi o polokalame faale-aoaoga, ua manatu ai le Matagaluega, ua alagataua ona toe teuteu lenei vaega o le Tulafono. Ia le na o faiaoga e faatulafonoina, ae ia faapea foi ma tamaiti aoga i taimi ma itula e fai ai polokalame faale-aoaoga.

Ia lau Afioga o le faamalamalamaga lena i le teuteuga ia ma suiga o le Tulafono 2009 ia o lea ua suia nei i Tulafono o Aoga 2018. Ia malou faaloalo tele.

FOFOGA FETALAI: Ia malo faafetai, ia ma e ua logo faafofoga foi ia le Palemene i le saunoaga manino a lau Afioga i le Minisita o Aoga. Se i tuu atu pea pe i ai ni sui usufono e fia saunoa, ia se i tulai mai sui usufono e fai saunoa e fua i ai ia tatou taimi galulue, 1,2,3,4 5 ia o le a maua tou avanoa pe a taliu mai i le tatou malologa.

Ou te faasilasila atu o le a faataatiaese ia galuega a le Fono Aoa mo lana malologa masani.

Na faataatiaese felafolafoaiga a le Fono Aoa mo lana malologa masani i le itula e 10:32 i le taeao ma toe amatalia i le itula e 11:18 i le taeao.

Na toe faaauu felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Aoga 2018.

FOFOGA FETALAI: Ou te faasilasila atu ua toe amatalia ia Taulumaga ma Galuega a le Fono Aoa Faitulafono. Ia amalo le onosai, maua le faapoopoga o le faasiligamalosi e faaauu ai ia le tatou galuega.

Ia e faia ia le tatou malologa o tutulai mai sui usufono e fia saunoa ina ua maea le saunoaga faamalamalama a le Afioga i le Minisita o Aoga Taaloga ma Aganuu.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

Ia malou faaaloalo ou te tapa le sui usufono mo Faasaleleaga Nu.1. i Sisifo. Tulai maia lau Afioga i le sui usufono.

Afioga Hon GATOLOAIFAANA AMATAGA ALESANA GIDLOW (Faasaleleaga Nu.1): Faafetai tele i lau Afioga i le Fofoga Fetalai mo le avanoa, ia e muamua lava ona faatalofa atu i lenei taeao matagofie i le mamalu o le tatou Palemene, aemaise foi o le faafogafoga mai o Samoa. Ae e muamua ona ou faafetai i le Minisita o Aoga ma le Matagaluega, aua o le upu foi lea o le au o matua fanau. So o se mea lava la e aoga ma atinae ai soifua manuia o outou alo ma a tatou fanau, e matuai lagolagoina ma talisapaia. O le mea lea e faafetaia atu ai i lenei Tulafono, e le o faatamala foi i le faafaileleina o lana aoaoina o a tatou fanau aua lumanai manuia o latou aiga aemaise ia si o tatou atunuu.

Ae i ai lava ni nai vaega ia ou te fia talanoa atu ai i le tatou Tulafono. O le mea muamua lava, pe ua aotauina lelei ia tatou faiaoga mo lea foi fuafuaga o le a i ai. Ia aua o lea e pasi loa le Tulafono amata loa masalo e amata faamamalu po o lea tausaga i le amataga foi i lea tausaga o aoga, ia po o i ai la se fuafuaga mo lenei tausaga ae e pei o se popolega po o lea ona tapenaina o alii ma tamaitai faiaoga mo lea foi o le aoaoina o le soifua aoaoina o fanau ia ae faapea foi i faleaoga o lo o faatino ai lea faamoemoe.

O lona lua o mea ou te fia talanoa i ai lau Afioga i le Fofoga Fetalai, o le tulaga lea o faasalaga, faafetai o lea ua tulai mai ai ni faasalaga e oo i e taumamafa ava i totonu o lotoa a aoga ma faleaoga, ia ae faapea ona aafia ai ma faleaoga. Ia aua o i o le faleaoga, e tatau lava ona i ai ni uiga ma ni amioga faapea e ono aoaoina ai fanau i ni tulaga le talafeagai mo lo latou olaga tauatiae.

E tatau la ona amatamea ia latou o lo o tau atiae ia latou fanau, ia aloalo mamao ma lea vaega. Ia ae ou te lagona lava sa tulai mai fua i le i ai o le vaega lea o le Tulafono, ae pau lava le popolega lau Afioga i le Minisita, o le tulaga lea ina ia mafai ona faamaoti mai i le tatou Tulafono, ia faasalaga, faasalaga e oo i ai pe a solia le Tulafono, ia po o le tamaititi ia tuaia le tamaititi ia aua e mautinoa o isi ua suspend, o isi ua faatea ma le aoga. Ao faiaoga, e tatau lava ona maoti mai ia faasalaga e oo i ai ina ia aua lava ne i i ai ia se alofaga, po o se avanoa foi e ono le oo ai ia le faasalaga e tatau ai i le faiaoga e le tatau e oo lava io le tulaga le talafeagai o lana auaunaga.

O le isi popolega lau Afioga i le Minisita ou te fia faaleoina, faafetai o lea o le a amata i le 4 tausaga le formal educational life o le tamaititi, o se fesili ma se lagona e ao ona faaleoina, o lea o le a tatou oo i le isi tulaga e faaopoopo ai ia le galuega, ae ou te fia fesili atu lava, sa i ai lava ia le vaivaiga i le tatou tulaga i le numera ma le faitau tusi. Po o ua i ai ni suiga? Po o ua atoatoa le aoaoina? O ia vaega i totonu o aoga, ina ia atoatoa ai ma ia maua ai le fesoasoani i fanau uma lava, amata mai lava i le ua lelei foi ma atoatoa lana pueina o aoaoga, i le e vaivai.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

Aua ne i o tatou faatuatuanai nai alo ma fanau e vaivai ona o,, po o le a lava le mafuaaga. Ae ou te lagona lava, o le faamoemoe lava, o le faiaoga ua matuai aotauina ma finau, finau mo tamaiti uma o lo o i totonu o lana potu aoga, ina ia maua lona avanoa e aoaoina ai lona mafaufau. O le mea la lea e fia avatu ai lava se vaivaiga ma se tuualalo, ua ou manatua ai le upu a le loomatua o lo matou aiga, tulouna lava lau Afioga i le Fofoga Fetalai ma le paia o le Palemene, aua le futi le moa ma tuu, ae futi lava futi ia uma, aua le futi ae toe oso futi le isi mea.

E pei o le popolega lena, ia atoatoa le auaunaga ua tatou faamoemoe nei i ai mo a tatou fanau, i le taimi lenei i mea uma lava tau aoaoga, aemaise lava i le numera ma le faitau tusi, aua e toe faaopoopo atu le isi tausaga 4, ae faafefea la e opu lava le Tausaga 5 ma le 6, 7 i le vaega lea? Faafefea? E pei o se popolega lena, ou te manatu let's focus on what we are doing now. Focus ina ia atoatoa mea ia ina ia oo atu le tamaititi i lona Tausaga 8, ae la ua iloa faitau tusi pe tusi le igoa. Aua ou te lagona o la ua i ai tamaiti i le 5 ma le 6, ae e le o iloa faitau tusi, e le o iloa tusitusi.

Ia e pei o le lagona lena e tuu atu i lau Afioga i le Minisita tau lava ina faamalosia ai le tatou Tulafono, e le gata i lea, faamalosia ai le tulaga tau le aoaoga i totonu o le tatou atunuu. Ia faafetai tele lava mo lou avanoa lau Afioga i le Fofoga Fetalai.

FOFOGA FETALAI: Malo faafetai i le saunoaga a le sui usufono mamalu. Ia sosoo ia ia tamaitai o le Maota. Ia tulai mai le sui usufono mo Gagaifomauga Nu.3. ia lau Afioga i le sui usufono.

Afioga FAAULUSAU ROSA DUFFY-STOWERS (Gagaifomauga Nu.3): Faafetai i lau Afioga i le Fofoga Fetalai mo le avanoa, ia faatalofa atu foi i lau Afioga ia faapea foi le mamalu o le Palemene, le Afioga i le Palemia ma le Kapeneta ia sui usufono mamalu o le Palemene nei, ia faapea foi Samoa o lo o faafogafoga mai ma Samoa ua potopoto.

Ae e faaleoina se agaga faafetai i lau Afioga i le Minisita, ona o le faatauina o le Tulafono lea ua mafai ai ona faatulafonoina ina ia amata mai lalo ia le aoaoina o le tamaititi. Ia ae o le mea lea e fia agai i ai se manatu, o le not only o le capacity o faiaoga e faatinoina ia le auaunaga lea, ae e faaleoina foi le itu lea i disable, i tamaiti ia e le atoa le malos i mafaufau ia ma le tino, ona ou te talitonu e tele lava i inei i le taulaga e i ai aoga ia o le Early childhood I mean o aoga ia o le Loto Taumafai ma le isi aoga na, ao tua i nuu i tua, e nao aoga faataitai e i ai, ae e le o i ai ni aoga faapitua i le itumalo ma lea itumalo.

Ae afai la o lea o le a faatino le Tulafono i vaega eseese o le atunuu, e tatau la ona lava tapena ai ma se isi e mafai ona aotauina ia tamaiti ia e le o atoatoa le malos i le tino ma le mafaufau.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

O le vaega e lua o se lagona o le enforcement po o le tulaga o le faamalosiga o Tulafono ina ia mafai ai ona ave uma tamaiti e ave e aoga aua e i ai nisi nuu e le o i ai ni aoga faataitai, ae i ai isi nuu o la e i ai ina ia faamalosia ai nisi vaega po o itumalo foi e mafai ona faamalosia ai se vaega o le itumalo ia fai ai lava se aoga faataitai e agai uma i ai le itumalo. Ma lou faaaloalo. Faafetai mo le avanoa.

FOFOGA FETALAI: Malo faafetai saunoa. Malie Aana Alofi Nu.2, se i sosoo ma lau Afioga pe a maea le saunoaga a Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga mo le avanoa. E taua tele lenei Tulafono Tau Faaofi ua tuuina mai e le Matagaluega o Aoga. Ma e le tasi ai i se Tulafono ua aumai e le Matagaluga lenei, mai lava i tausaga e tele sa ou ai i totonu o le Palemene o lo o vaaia pea le tele o Tulafono fesuisui. Ina ua aumai le Tulafono lea o le compulsory education i tausaga e le i mamao atu, a saili faamaumauga lau Afioga, ina ua aumai tausaga ia e 5-14, sa ou faamamafa i lea taimi, aisea e faagata ai i le 14? Tuutuu i luga i le 18, aua e leai se tamaitiiti e tatau ona iu i le 14. Ia, faafetai la o lea ua aumai le 16, a o lou lava talitonuga e tatau loa ona tuu i luga i le 18, aua o i lea e taumatuaina ai le tele o tagata aua e aoga le faaoga pea. A o le mea la lea ou te fesiligia, ia manatua foi o lenei mea e le o se mea fou. Na tatou o atu e avatu tatou fanau e faaaooga i le 5 tausaga i aso ia po o lalo ane ae fai mai e leai se i atoa le lima po o le lata i le 6. Ia o lea foi la ua omai nei tagata ma nei mea fou, omai tuu i lalo i le fa, o lea ua omai faa-compulsory. Ia, tailo i ai lau Afioga, ioe. Ae i lou talitonuga o le lima lava e tatau ona i ai. O lea foi e fai finauga i Niu Sila e le i mamao atu nei i le mea lava lea o le tausaga amata. A ia manatua la, o aoga ia i Niu Sila ma Ausetalia i iunivesite, e mafai lava ona e alu e te aoga i le iunivesite i tausaga i lalo, ae le mafai ona e alu i totonu i le university campus seiloga ua atoa le 18 tausaga, i Ausetalia lea, e le o suia. O Niu Sila, pei lava o la e ua toe tau sui nei, ai o se talosaga a le tatou Malo ma le Palemia, o lea ua toe tuutuu ifo i lalo i le 17 tausaga. Ai seiloga e 18 tausaga faatoa mafai ona e alu e te nofo i le campus lea i le iunivesite ma e aoga ai, leaga e fua la i tausaga nei. Afai la e te amata i le 4, ia, tailo i ai i lau Afioga. Ailoga e afaina ai le early childhood aua e le tau aumaia tatou te o e ave i aoga foi nei tau amata. Ae po ua lava la le capacity, po ua lava ni faiaoga i tua i nuu i tua e fai ai mea nei, aua pei lava ou te iloa o le tele o aoga faataitai nei o lea e i totonu o le taulaga.

O le isi mea lau Afioga i le Minisita, se i tau tulituli pea le tatou compulsory education aua e le o se mea fou aua o lea lava tatou te vaai i le tele o tamaiti e le o o i le aoga. Ia faafetai aua o mea ia e fai i tua i nuu i alii ma faipule o le taulaga, se i vaai i le ofisa o leoleo po o ai tonu e vaai nei mea i tamaiti feoi solo. Aua o lea ua fai e le Malo le Tulafono ia aoaoina uma a tatou fanau.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

Ona ou oo mai lea lau Afioga i le mea lea o le igoa, muamua, le mea lea ua toe sui ai le igoa lea o le special needs i le disability. E le i leva nei lava ona sui le mea lea, o le Ofisa o Aoga foi na suia le mea lea, special needs. O le manaia ia o le upu, a o le a le mea ua toe sui ai fua. Ua le aumaia la se upu e tasi pei o le disability e tasi le upu, a o lea ua aumai le fuaiupu atoa. O lea ua aumai le meaning o le mea, a o le manaia ia o le mea lea sa i ai o le special needs, manaoga faapitoa. A e tago la e faaliliu le faiga lea i le suiga lea ua aumai nei, le disability, mental and physical. O lona uiga ua lua ituaiga mea ia e aumai ai, ae tasi lava le upu lea e affi ai, ae manatua o i lea na alu ai nei tatou tupe lea na pasia foi nei le isi vaegatupe tele lea na ave i le Samoan Commission. Afai la o mea ia o lea na aumai i totonu o le Samoan Commission lea, e tele a le faaletonu. Lau Afioga, ia tailo i ai, ae manaia lava le upu lea na i ai.

O le isi mea lau Afioga, e taua tele le mea lea, e le mama i lou mafaufau leaga ua leva foi ona tatou pisa ai, sa lauga ai foi le tele o sui usufono o le mea lea o le aoaiga talafeagai, disciplinary action i totonu o aoga. Faafetai le Minisita i le lototele e aumai leaga e le faigofie e tele foi isi Tulafono faava o Malo e puipuia ai tatou mai le fai o mea nei. A o lea ua aumai, ou te matua lagolagoina, a o le faatinoga la lea e avatu ai se tuualalo i lau Afioga i le Minisita ma le... leaga o le upu a ia i le faauigaga o upu o le upu lea o le force. Po o lea le ituaiga force, o le force a o le force. Ioe. O lea e faa-Samoa mai, o le faamalosi a. O le a le mea e le tuu i ai le disciplinary action po o se aoaiga talafeagai? Aua o le mea lea e faafetai ai o lea ua aumai le Tulafono e puipuia ai faiaoga mai le mea lea. O le tausaga nei o lea ua outou faafofoga ua oo lima o tamaiti aoga i faiaoga. Ina ua tupu le mea lea, na talo le fonu a le board a le kolisi o Samoa, ou fai i le pule, taeao fai le assembly ia e matua tautala i tamaiti aoga nei ma fai i ai, o le tamaitiiti e faia le mea lena i le kolisi o Samoa, e matua fai i ai le iuga talafeagai. E sa. A o lea la ua aumai i le Tulafono, na pau o le mea, i le faatinoga o le upu ma le faatinoga o le mea, ne i te i ua... aua o lea ua aumai le Tulafono e puipui ai e faiaoga, ae a lau Afioga i le Pule pe a toe foi i le mea na sau ai, tuu i le pule aoga, o le mea lena a le pule aoga e fai. A sese lava tuli e le pule aoga, see mai po o le a le mea e fai e fue ai. O lona la aua ne i faaaogaina se mea faitino ae faaoga lima. Aua o le mea lea na tupu, na molia le matou faiaoga i aso ia, ua fue [matou i le pau ave loa molia i le Tulafono, fai le faamasinoga fai mai le pule aoga, lau afioga, o le upu lea e sau i le Tulafono, e sa le faaoolima, ae leai se sa le faaopau, ou nofo loa faaoga ma le pau. A o lea la ua fai mai nei le Tulafono, sa le faaopau, ae taga le faaoolima. Ae manatua e faasa foi i le tatou Tulafono. O se mea e tatau ona toe tilotilo i ai. E talia e lou sui le vaega o le Tulafono, faafetai i le Afioga i le Minisita i lenei mea ua aumai, ae tatau ona tilotilo i ai i nai vaega ina ia faigofie ona faitino ma faafoe ma faataunuu ma le manuia le tatou Tulafono. O le mea e tatau ona fai, leaga o aoga o le lumanai o tatou, ia faapena ona faatupu.](#)

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

Ia leaga o lea e pei ua e augani mai lau Afioga i le Fofoga Fetalai, ua ta alofa foi ia te oe, oka sou alofa ia te oe. Ia manuia le tatou Fono.

FOFOGA FETALAI: Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e fesoasoani tele le Tulafono lenei i le tele o faafitauli o lo o faafeagai nei i totonu o tatou aoga, ae i ai lava le mea lea e galo i le Afioga i le sui usufono sa saunoa nei. O so o se Tulafono lava, e i ai lava le faautautaga tatau. O le faautautaga tatau la lea la e implied o le gagana lena e malamalama faigofie. Ae malie ia se tatou alu i le teuteuga lea ua i ai nei, leaga o le mea lea ua agai i ai, o isi atunuu o le lalolagi, ua amata i le tolu tausaga, o isi na atunuu o le lalolagi, ua amata i le tolu tausaga ona o le mea lea ua agai i ai le tele o matua ua amata ona ave tamaiti i le aoga i le lua tausaga. O le suiga lava o le olaga, o le lua tausaga i le taimi lenei e pei o le 100 maila i le itula le alu alu o le faiai o le tamaitiiti, e le tatau lava ona fai se faiga, o tulaga uma lava ia o education authorities i atunuu, e tilotilo pea i le tulaga o aoaoga ma le fesuiaga e tatau ona fai. O lea la ua tuu mai i lalo, a o le mea lea sa tatou i ai muamua, o le soona tuu i luga o tausaga, ia o lea e silafia lelei taimi sa tatou omai ai mai Niu Sila, o le tele ia o na faaletonu sa i ai i na taimi. O le tele o tatou, e faatoa develop foi lele le mafaufau ina ua matua. O lea la ua tatou alu faasolosologa sue, e sao ai lava le tala lea a e tuu ni tagata popoto se toalua e talanoa i se mataupu e uma ifo na o le fusu fusu fusu e le fia toilalo le isi tagata poto i le isi tagata poto, a o lea ua faatoto mai le mea tatou te alu ai. A o aso la, e te matua loa lava tuli oe, pe le talia oe. O le mea lena o lea e tupu nei o lea e aumai lava ona o faiga a Niu Sila? A leai sou faaiu papalagi e le talia oe i Malifa. O le a la le mea na tupu? Lea ua o loa isi tamaiti ua le faaiu i o latou tama ae faaiu i igoa afakasi o latou tina ona te i lava lea ua afakasi atu ai ae pulapula si toeaina na mafua ai ona gauaano le afakasi e nofo i le toeaina. O la e la ua o faaafakasi ai tamaiti, ae le afakasi e tatau ona Samoa. O tulafono na sa i ai a Niu Sila. E oo foi i le tulaga o le maualuga, sa tele lava ina tutuli nai o tatou... o le laki lava o au e fa tausaga o ou vasega tasi lava, o ou primer one. Ia o la e la ta te ma e tau atu lena matatia maoae na ia te au o le matatia e te ma e faasalalau leaga e aliali mai ai i ina lou faavalevalea, a o lea na oo lava ina toe feoloolo le mafaufau o si tama. O le mea lea, malilie ia tatou o ai faapea.

FOFOGA FETALAI: Ia se i tulai mai le sui usufono mo Aana Alofi Nu.2. Masalo toe toalua, toe toatolu e fia saunoa.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e faamalulu atu lava i le sui usufono, e i ai lava la si mea sia ua galo ia te au, na ona faasilasila atu i tatou Afioga, e i ai le taaloga lea o le a fai i le vaiaso fou, o le taaloga lakapi lea e qualify ai tatou i taaloga a le lalolagi. E ui lava la ia sefulu tausaga e le o toe malo tatou, ae ua tatau nei ona malo tatou i le taaloga lea o le a fai lea o le a fai mai i fanua. O lea la e tau saili ai sina seleni foi lele a nai tama ona o le tulaga foi lea e uma le taaloga iinei toe felelei i Siamani e taaalo ai. Faamolemole a i ai lava ni tou tai \$2 o i ai, e fai nei le matou leitiofoni. Ia o le faasalalaua lea e aunoa ma se tau o lea ua faasalalau atu ai i le tatou Maota. Ae fai nei si a matou leitiofoni e fesoasoani ai i nai tama. Ia o le faasilasilaga lea ma le faaaloalo.

FOFOGA FETALAI: Malo. Ia tautuana ma sui usufono mamalu ua tapa se fesoasoani e ala i le leitiofoni e tapena ai le tatou autaaalo, e leai e lafo atu i le fai mea lelei o le sui usufono mamalu, ia manatua fanau o le lumanai o le atunuu.

Ia tulai maia lau Afioga i le sui usufono mo Aana Alofi Nu.2.

Tofa ILI SETEFANO TAATEO TAFILI (Aana Alofi Nu.2): Faafetai lava i lau Afioga i le Fofoga Fetalai mo le avanoa, faafetai foi i le taumafataga sa faapea ona alo atu i ai le Palemene nei i lau Afioga faapea foi le Ofisa o le Fono. E manatu ua sao i alo foi le tauteuga i le Afioga i le Palemia ma le Kapeneta ua matou aai foi lenei itu ma maoona, faafetai lava mo le faaaloalo. E faamalulu atu foi i le Palemia mo le faasilasilaga o le leitiofoni, ua tautuauega mai ua leai se mea o totoe i le taga a le sui usufono toe lava o le \$50 lena na ofo atu. Ae o lenei itula ou te tulai ma lou agaga faaaloalo e avatu se sao o lenei itumalo e tusa ai ma le Tulafono Tau Faaofi ua opea i lumamea i lenei foi taeao.

E lua lava mea taua i le soifuaga o se atunuu manuia, o le soifua maloloina ma le soifua aoaoina. O le ala foi lena ua ou tulai atu ai e lagolago lenei itumalo i le Tulafono Tau Faaofi o Teuteuga o Mea Tau Aoga. E matuai talisapaia faatuaeleele lenei Tulafono i ona vaega uma, a o le faaupuga lea e faapea mai e compulsory mai le tausaga e fa. O le fesili la, e faapefea le tamaitiiti e oo atu e faatonu i le primer one e le i aoga i le aoga faataitai? O le tulaga la lena e tatau ona fai i ai se fua a le Minisita ma le Tulafono ina ia faamallosia aua o isi afioaga e leai se aoga faataitai, a o isi foi afioaga e tailua aoga faataitai, o le aoga a le nuu ma le aoga a le faifeau. Ae pei o tulaga la na e tatau ona fai i ai se fua, e le tatau ona talia le tamaititi i le tausaga muamua pe afai e le i aoaoina mai le aoga faataitai.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

A o tulaga uma pei ona taoto mai ai le Tulafono, o lea ua malama i ulugalua pei ona i ai le pre sitting a le tatou Palemene, ae pei o tulaga na aua i le matou foi taumafai atu, o le aoga faataitai a le nuu e le i afa le tausaga a ua papau le faaso'a a le nuu aua e totogi e le nuu faiaoga faataitai, ona tuufesili lea pe faaauau pe le faaauauina. Ae o le ala lena o le talisapaia o lenei Tulafono Tau Faaofi, aua o lea o le a i lalo o le faamalu a le Ofisa o Aoga tulaga uma tau tupe. O le tulai atu lea ma le agaga faaaloalo. Ia manuia le Fono.

FOFOGA FETALAI: Malo faafetai. Ia se i tulai mai le Afioga i le Sui Fofoga Fetalai ona faaiu lea i le sui usufono mo Faasalelega Nu.2 le Afioga ia Pau.

Tofa NAFOITOA TALAIMANU KETI (Gagaemauga Nu.3): Ou te muai faafeiloai ma le faaaloalo i lau Afioga i le Foga Fetalai o le Fonousu, e faafeiloai foi i le paia maualuga o le Palemene ma lenei Maota. E le vaea i se lauga a Matautu po o Gagaemauga Nu.3, e mausali ma maualuga. Lau Afioga i le Fofoga Fetalai o le ala o so matou tulai e fai foi so matou manatu. O au le isi tagata sa i ai i le 2009 i le Matagaluga o Leoleo i le tau amataga i le galulue faatasi ma le Matagaluga o Aoga i le fauina ma le taumafai e faatino le galuga. E le i faigofie. O le mea lea e fia momoli ai le faamalo ma le faafetai i le Afioga i le Minisita faapea foi le Ofisa Sili o Pulega ma e lagolago i ai. O lea e maitau atu o lea e agai e sui suiga lelei, o lau faitau atu i ai e lagolagoina nisi o vaega. Na pau lava lea o le tele o amendments lea e tau fai, ae na o nai fesili laiti lava e toe silasila ane pe a tusa ai ma le finagalo, Section 23(3), lena e faapea e teuteu, e ui lava i le fuaiupu 2, e mafai e so o se faiaoga i so o se aoga maualuga, a o lea tatou te taumafai i le compulsory education. Po o le a le mea ua faailoa ai na o aoga maualuluga ae faapefea primary school. E tatau lava ona maioio, black and white lava nai mea na e aua ne i i ai ni loopholes. Na pau lena o se vaega ou te fia... ona ou see mai lea agai i lalo i le Vaega 23 lea ou te i ai. E lua lava nai tagata tetele o lea e taua, a talanoa i le tulafono o aoga e ese le fiafia o lenei itumalo e talanoa ai leaga e taua mo le lumanai manuia, e le gata i aiga, o ekalesia ma le Malo foi. E taua tele, malo faafetai i le silasila mamao. Na pau lava o lea, o lea e tele ina agai i le tamaitiiti, e lua lava, o le faiaoga ma le tamaitiiti aoga. E tatau ona maioio lelei mea ia. I lou la talitonuga i le tulaga o tulafono, o lena e aumai ai le 3A ma le 3B. Ia, i le tulaga o le reasonable force aumai ai ma taua ai le faaogaina o se mea faitino. O le tuualalo i lau Afioga i le Minisita ma le pulega o le Ofisa o Aoga, ae faapefea le faiaoga foi lea na te faaosooso, insight, legal terms faaoga atu lau Afioga, o lena e te silafia lelei lava sa tatou aoga ai, who assist, aua o le mea lena o lea e tulai mai i le Matagaluga o Leoleo e tauaimisa lava ae fai atu le suesuega, e tausolomua i le faiaoga ona faaosooso tamaiti, aua tou te solomuli i le aoga lela pe a oo i le taimi e... ona lafi lava lea o ia. Ae omai nai fanau i le ofisa ma faatalanoa ai.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

O le mea lea pe le mafai e lau Afioga i le Minisita ma le Pulega ona toe silasila i ai, toe faaopoopo i ai se 3C any teacher who insight or assist, se mea faapena, ioe. Ia, lau Afioga, o legal terms uma na. A tuu i ai mea ia i totonu lea e fai mai, a teacher who uses an object o lona uiga o le mea faitino la lena. A faapefea la le mea foi lea o le faaosooso atu i tua, insight? O le mea lena ou te fautuaina ai lau Afioga i le Minisita, tuu i ai i totonu. Aua lava ne i tuua se avanoa aua o lea o le a agai tamaiti aoga, ae faapefea le au ula lea e lalafi ai i tua? Si tamai mea laititi lava lea lau Afioga i le Fofoga Fetalai, e le i fauina Roma i se aso e tasi. Malo Afamasaga i lou tulai mai lau afioga i le tamaiti pule sili, sui sui, e ala ona sui ina ia lelei. E lagolagoina e lenei sui usufono suiga, na pau lava lena o nai mea e faaopoopo i ai, ne i matele foi i tamaiti aoga, ae galo ai faiaoga. Ia manuia le tatou Fono.

FOFOGA FETALAI: Malo. Tulai mai lau Afioga i le sui usufono mo Faasaleleaga Nu.2.

Afioga PAU SEFO TAUMATA PAU (Faasaleleaga Nu.2): Faafetai i lau Afioga i le Fofoga Fetalai mo lenei avanoa. E ese le Tulafono pei ona aumai. O le vaega lea lea ua sui nei i le 24 lea e faapea mai, o le faasaina o le avamalosi le upu lea o le faaaogaina i le malae o le aoga. E pei o le upu lea e le o manino lelei, leaga a fesiligia taaloga foi ia e fesili po o fea e fai ai taaloga, ona faapea mai lea o le malae o le aoga i Papauta. O le tele lava o faaiuga o tausaga, e fai ai fiafia a faiaoga i le uma o aoga i lea taimi ma lea taimi. O le mea e popole ai, i te i foi ua i ai ni faavevesi i le taimi lea ona faapea lea ua soli le tulafono a o lea e manino ma malamalama le upu lea o le malae. O lona uiga po o aofia ai i totonu ma faleaoga e tu i totonu o le fanua. E manaia pe a faapea o le property e tataua ona tuu i totonu o le vaega lea ina ia mautinoa o la e lavea uma i totonu, po o a uma mea o i ai, po o a lava tulimanu o le fanua po o totonu o le malae o faleaoga po o le ofisa o aoga ina ia mautinoa ma aapapa i ai le pulega o le Matagaluega ina ia manino ma puipui i lea vaega. Ona pau lea o se vaega e avatu ai se manatu, o le vaega lea pei ona faatu mai e le Palemia e uiga i le tatou au, manaia tele. Masalo ua tuai mai a ua amata ona matou sao atu i le tai \$100 ma le tai \$200, a o le taua lava o le talosaga, se tuutuu i lalo le tatou... aua a tumu le malae lea, e le ofi, ou te iloa e manumalo aua o le isi vaega lena e faamalosiau i le tatou au e oo i lalo o mutia i lata vaai i tapuaiga a isi atunuu, ae tuutuu i lalo le ulu lea. Aua a malo nei, e toe sau foi le isi leitiofoni o le a toe sauni le isi au, masalo e faaluaina pe faatoluina. Ae lagolagoina le Tulafono lea o le Teuteuga aua le ofisa o aoga ma le lumanai o le fanua manuia o le atunuu aemaise le tatou au, ia fai se tatou malo ina ia mafai ona tatou o i le ipu a le lalolagi. Ia manuia le Fono, manuia lau Afioga.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

FOFOGA FETALAI: Malo faafetai saunoa i lau Afioga i le sui usufono mamalu. Ou te manatu ua maea sui usufono e fia saunoa i lenei Tulafono Tau Faaofi, e i ai le manatu....

Afioga Tapulesatele Mauteni Tamasone Metuli II Esera (Vaisigano Nu.2): Lau Afioga i le Fofoga Fetalai, ou te talosaga atu i lau Afioga, e puupuu lava se manatu. Lau Afioga i le Fofoga Fetalai...

FOFOGA FETALAI: Ou te faamalulu atu i lau Afioga i le Minisita na o sina lima lava minute ma le sui usufono.

Afioga TAPULESATELE MAUTENI TAMASONE METULI II ESERA: Lau Afioga i le Fofoga Fetalai faafetai tele mo lou avanoa. Ae muamua ona avatu le faafetai i le Afioga i le Minisita o Aoga, le Ofisa Sili foi o Pulega ma le Matagaluega i le tulaga o lenei Tulafono. O le vaega laititi lava o lea e toe fia faamanatu atu ai, leaga o lea e pei sa taufaalogologo atu e le i...toe faamanatu atu. O le tulaga lea e amata ai le tamaititi i le tulaga lua. E i ai lava le manatu, a faapea e atoa le tausaga e lima o le tamaititi i nai masina ia e lua o le tausaga. E le tatau ona faatali seia oo i le isi tausaga ona faatoa aoga lea o le tamaititi i le tulaga lua. E i ai le manatu a atoa loa le lima tausaga, agai loa le tamaititi e amata lana tulaga lua i lana Year 1. E pei o le tulaga lea e pei ona avatu ai se manatu, po o le a se finagalo o le Minisita foi ma le Matagaluega. E taua tele le tulaga lea, aua e leai se aoga tatou te o ai e amata le.....atoa le lima tausaga ia Mati ae faatali se i oo i le isi tausaga ona faatoa amata lea. Afai lava e atoa ia Me le lima tausaga o le tamaititi, amata ai lona alu e amata lana tulaga lua. E pei o le vaega lea o lea e fia avatu ai se manatu.

O le isi tulaga, i le tulaga lea e pei ona iai nai aoga amata ia ua i ai i o tatou nuu. E i ai lava le talitonuga o le tofa foi a lena itu e taumafai e fesoasoani e faaoga ia aoga ia ua i ai. E moni lava o le tele foi o isi aoga amata o ekalesia, ae ou te iloa e faapena le tulaga e tatau ona i ai.

E avatu lau faafetai, ona o lea ua ou maua lou finagalo foi, e pei ona i ai talosaga sa tuuina atu, o lea ua i ai le fuafuaga mo le faleaoga o si o matou nuu i Papa. E i ai foi le faafetai e fia avatu i lau afioga i le Minisita le pule sili foi ma le Pulega, ona o lea ua talia foi le talosaga, e faaauau si o matou pule aoga i Sataua. Atoa ai ma le tulaga lea e pei ona faatalanoaina. E lelei lava le tulaga lea faapea e fua tamaiti aoga i le fuainumera lea e faaoga po o le tolusefulu. Ae i ai le manatu foi lea e pei foi ona talosaga atu ai, afai lava o i ai se isi faiaoga, e pei foi ona e saunoa, e faigata tele i nuu i tua ma Savaii ona faapea o le a sau le faiaoga lea e faiaoga iinei i Apia, ae o la e i ai le avanoa e faiaoga ai i tua. O le a le mea o i ai pe a faapea na o le toa luasefulu tamaiti o le vasega, aua o le isi tulaga e lelei tele foi lea mea. O le toaititi o tamaiti aoga ae toatele faiaoga. E pei o le tulaga lea e toe faalatalata atu ai i lau afioga, le Pulega foi ma le Matagaluega.

22 IUNI 2018

**Tulafono Tau Faaofi o Teuteuga o le Tulafono o Aoga 2018
- faitauga faalua**

E lagolago malosi lava e lenei foi itumalo le Tulafono Tau Faaofi e pei ona i ai.

E faamuliaina, e pei foi ona saunoa le Palemia, o lea lava e i ou tafatafa se tasi o pepa o lea foi e tau faatumu mo le tatou leitiofoni i le aoauli nei.

Ia manuia tele lau Afioga i le Fofoga Fetalai, faapea foi le mamalu o le Maota nei.

FOFOGA FETALAI: Malo faafetai. Se i faamaopopo ifo la tatou pepa lena e tau ai le tatou Palemene. Ma ou te faamalulu atu i lau Afioga i le Minisita o Aoga, Taaloga ma Aganuu, ona o lea ua tatou toai i le taimi e manava ai a tatou galuega i le Aso Faraile. Ona o le Aso Faraile lava latou e faapitoa tatou te...Pe afai e le umi le saunoaga i mea sa finagalo i ai le sui usufono, ona toe tuu atu lea o se isi lima minute.

E i ai le manatu, e a pe a tapena lelei lou sa, aua e i ai foi nisi o faauilavea i mea e faapena ona le tau i ai le finagalo o sui usufono mamalu, i sau saunoaga faamalamalama. Ae lelei ona tapena lelei lau saunoaga faamalamalama i le Aso Gafua pe a pule alofa le Atua e aulia i le lagi e mama ma le soifua manuia. Ou te faamalulu atu ai i lau Afioga i le Minisita o Aoga. Ona o lea ua tatou taunuu i siui o le Aso Faraile o le 12:00.

Ae tatou te le i tolopo, ou te tapa ma le faaaloalo lau susuga i le aoao po o le Afioga i le sui usufono mo Samatau ma Falelatai na te faaiuina la tatou Fonotaga i se tatalo.

Na motusia Felafolafoaiga ina ua tolopo Taulumaga a le Fono Aoao i le itula e 12:02 i le tutonu o le la, seia aulia le Aso Gafua, 25 Iuni 2018 i le itula e 9:00 i le taeeo.

ASO GAFUA, 25 IUNI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua amatalia nei Taulumaga ma Galuega a le Fono Aoaofa Faitulafono.

E avea foi lenei avanoa ou te faatalofa atu ai ma le agaga faaaloalo i le paia o le Palemene, i le afio o lau Afioga i le Taitai o le Malo, le mamalu o le Kapeneta faapea foi Minisita Lagolago, Taitaifono ma sui usufono mamalu o le Palemene, ua mafai ona tatou faatasi i lenei taeao. Malo le lagi e mama, malo le soifua manuia.

E faatalofa atu foi i le aufaigaluega galulue a le Malo i Faauluuluga o Matagaluega ma Faalapotopotoga eseese a le Malo, aemaise foi o ofisa ma matagaluega o lo o faapena ona tofua sao i le faatinoga o le tatou galuega i lenei taeao. Malo le soifua, malo foi le lagi e mama i lenei taeao fou.

**TULAFONO TAU FAAOFI O TEUTEUGA O LE TULAFONO O
AOGA 2018 – felafolafoga i luga o le faitauga faalua, faaauau mai le
aso 22/6/2018**

FOFOGA FETALAI: E manava le galuega i lenei vaiaso ua tuana'i, ua maea ona saunoa sui usufono mamalu e tusa ai o le Tulafono Tau Faaofi. Ma ou te tapa ma le faaaloalo lau Afioga i le Minisita mo Aoga, Taaloga ma Aganuu e te saunoa e talifuaitau i mea sa laga e sui usufono e tusa ai o le Tulafono Tau Faaofi e pei ona talanoaina.

Ou te tapa ma le faaaloalo lau Afioga i le Minisita mo Aoga.

Afioga Hon LOAU SOLA KENETI SIO (Minisita mo Aoga, Taaloga ma Aganuu): Faafetai atu i lau Afioga i le Fofoga Fetalai mo le avanoa taua i lenei taeao, ou te tulai atu foi ma le ava tele ma le faaaloalo. E faapena foi ona i ai le lagona e faatalofa atu i lau Afioga i le Fofoga Fetalai i lenei taeao o lele ua maitau, ia ua sootuli le Maota nei. Ua maleifua mai foi i le alofa ma le agalelei o lo tatou Tama i le lagi i faguga lelei i lenei taeao.

E manatu foi o lea ua e faatamamua ma molimoli lapalapaomalo ina ua fai ai lou fofoga ma fofoga taumolimoli o le paia o le Maota nei i ona tulaga faalupea se i sula lava le alofa ma le agalelei o le Atua e pei ona fofogaina e lau Atua.